

**କରିହ୍ନୀୟମାନଙ୍କ ନିକଟକୁ ପାଉଲଙ୍କ ଦ୍ଵିତୀୟ  
ପତ୍ର  
କରିନ୍ତିୟଇଂନେ ଡାଗ୍ରା ପାଉଲ୍‌ନେ  
ଦୁତିୟ ଉଲିଆଃ  
କରିନ୍ତିୟ ବଇ ବିସୟରେ ଉଃଡ଼ିକୁଗ୍  
ସାମୁଆଁ**

ମ୍ଵାର କରନ୍ତି ପ୍ରେରିତ୍ ପାଉଲ୍‌ନେ ବାନ୍ ତିଂଲେଃଏ ଜିସୁ କ୍ରିଷ୍ଟନେ ଜନମ୍‌ନେ ପ୍ରାୟ ୫୫-୫୬ ମୁଆଁ ଇଡ଼ିଙ୍ଗ୍ ଗୁଆରବଗେ । ନେନେ ଡାଗ୍ରା ଲେଃକ୍ନେ କରନ୍ତିୟ ମଣ୍ଡଲିକେ ଗୁଆରବକ୍ନେ ଉଲିଆ ବାନ୍ ଆକେନ୍ ଡିଙ୍ଗ୍‌କେ ପାଉଲ୍‌ନେ ଦୁତିୟ ଉଲିଆ । ପଣ୍ଡିତ୍‌ଇ ବିସ୍‌ବାସ୍ ଡିଙ୍ଗ୍‌ଆରଏ ଜେ ଆକେନ୍ ସେନ୍ନୁଗ୍ ପାଉଲ୍ କରନ୍ତିୟ ମଣ୍ଡଲି ଡାଗ୍ରା ମୁଇଙ୍ଗ୍ କସ୍ ଉଲିଆ ଗୁଆରବଗେ ୨:୩-୪ ପଦ୍‌ନ୍ନିଆ ମେଁ ମେଃନେ ସାମୁଆଁ ବିଃଏ, ଆଡ଼ନେ ମେଃଡିଗ୍ ପରମାନ୍ ନେନେ ଡାଗ୍ରା ଶୁ । ଡିଙ୍ଗ୍‌ଲେଃଏ ପାଉଲ୍ ମାକିଦନିଆନ୍ନିଆ ଲେଃନେ ବେଲା ୨ କରନ୍ତି ଗୁଆରବଗେ ୨:୧୩ ।

୨ କରନ୍ତି ଡିଙ୍ଗ୍‌କେ ମ୍ଵାର ଶୁ ଆଡେନ୍ ଜାବର୍ ନିଜର୍‌ନେ ବାରି ତେରେପେତେ ସାପା ସାମୁଆଁନ୍ନିଆ ଡିଙ୍ଗ୍‌ଡିକ୍ନେ । କରନ୍ତିନ୍ନିଆ ଲେଃକ୍ନେ ମଣ୍ଡଲି ବିସୟରେ ତିତସ୍‌ନେ ବାନ୍ ନିମାଣ୍ଡା କବର୍ ବାତେ ପାଉଲ୍ ସାର୍ଦା ଡିଙ୍ଗ୍‌ଡିକ୍ନେ । ଆକେନ୍ ଉଲିଆନ୍ନିଆ ମି ନିୟମ୍‌ନେ କିକେନେବାନ୍ ଦାନ୍ ବିସୟରେ ସିକ୍ୟା ବାନେଃଲେଏ । ଆକେନ୍ ସାମୁଆଁନ୍ନିଆ ଆଣ୍ଡିଡାଗ୍ରା ପାଉଲ୍ ଜିରୁସାଲମ୍‌ନେ ବିସ୍‌ବାସିଇଂକେ ସାଇଜ ଡିଙ୍ଗ୍‌ନେସା ତାରୁ ସାଲିଆନ୍‌ସା ଆଦେସ୍ ବିଃଡିଂକେ ୮-୯ ଆକେନ୍ ଆମାପାଡିଂକେ ଜେ ମଣ୍ଡଲି ବାଏରେ ବାନ୍ ଉଡ଼ିରୁଆ ନାଲେ ପ୍ରେରିତ୍‌ଇ ମେଇଂ ନିଜେକେ ପଦ୍ ଆମ୍ଵାନ୍‌ସା ପାଉଲ୍‌ନେ ବିରଦ୍‌ରେ ମଣ୍ଡଲିନେ ଉଡ଼ିରୁଆ ଟିକ୍ ରେମୁଆଁଇଂକେ ଦଦ୍ୟା ବେବଆର୍ ଡିଙ୍ଗ୍‌ଡିଂକେ । ମେଇଂ ପାଉଲ୍‌ନେ ଅଦିକାରକେ ସନ୍ଦେଅ ଡିଙ୍ଗ୍‌ଡିକ୍ନେ

। ତେସା ୨ କରନ୍ତି ସାରାସାରି ବାଗନ୍ନିଆ ମେଁ ମୁଇଂଜା ଜିସୁ କ୍ରିଷ୍ଟୁନେ ଅଦିକାରନ୍ନିଆ ମୁଇଂଜା ପ୍ରେରିତ୍ ଲେଃଠେ ଡାଗ୍ତେ ଡାଗ୍ତେ ଏତେ ପରମାନ୍ ତିଙ୍ଗିକେ ।

### ସାସ୍ତ୍ର ବିତ୍ତେ ଲେଃଠେ ସାମୁଆଁଇଂ

୧. ପାଉଲ୍ ଉଲିଆନେ ଆରାମ୍ରେ ସାର୍ଲ୍ ତିଙ୍ଗିକେ । ୧:୧-୭
୨. ପାଉଲ୍ ମେଁନେ ଖେନେ ତିଆର୍ ତିଂନିଆ ଆବଦ୍ଲେ ଆରି ମେଁଇଂନେ ବିସୟରେ ବାଲେଃଠେ ସାମୁଆଁ ଆରି ମେଁନେ ଉଲିଆ ବିସୟରେ ମେଁଇଂନେ ଜବାବ୍ । ୧:୮-୭:୧୭
୩. ପାଉଲ୍ ଜିରୁସାଲମ୍ନେ ବିସବାସିଇଂନେ ନସା ଦାନ୍ ସାଲିଆନେ ବିସୟରେ ଆଦେସ୍ ବିଃଡିଂକେ । ୮:୧-୯:୧୫
୪. ସାରାସାରି ପାଉଲ୍ ମେଁନେ ପ୍ରେରିତ୍ ପଦ୍ ରକ୍ୟା ତିଙ୍ଗିଏ ବାରି ବାମ୍ମୁଇଂତର୍ ଖେନେ ନସା ତରକ୍ ଆଃଡିଙ୍ଗିଏ । ୧୦:୧-୧୩:୧୦

୧ ✨ଇସ୍ପପରନେ ଇକ୍ତା ଅନୁସାରେ ସ୍ତ୍ରୀବକ୍ତେ ଜିସୁ କିସ୍ଟ ପେରିତ୍ ସିସ୍ ପାଉଲ୍ ବାରି ନେନେ ବୟାଁ ତିମତି କରିଛୁ ସହରନେ ଇସ୍ପପରନେ ମଣ୍ଡୁଲି ବାରି ଆଖାୟା ଦେସନେ ସାପାରେ ବିସବାସି ଡାଗ୍ରା ଏନ୍ ଉଲିଆ ଗୁଆରବକେ ।

୨ ନେନେ ଆବା ଇସ୍ପପର ବାରି ମାପୁ ଜିସୁ କିସ୍ଟ ଆପେକେ ଲିବିସ ବାରି ସାନ୍ତି ମିଲେଲେ ।

### ପାଉଲ୍ ଇସ୍ପପରକେ ଦନ୍ୟବାଦ୍ ବିଃଡିଂକେ

୩ ନେଁଇଂନେ ମାପୁ ଜିସୁ କିସ୍ଟନେ ଇସ୍ପପର ବାରି ଆବା ଦନ୍ୟ ମେଁ ଲିବିସଃନେ ଆବା ବାରି ସାପା ସାନ୍ତି ବିଃନେ ଇସ୍ପପର; ୪ ନେନେ ଅସ୍ବିଦା ବେଲା ମେଁ ଆନେକେ ଆଣ୍ଟିନେ ସାନ୍ତି ବିବକେ ଆଡେନ୍ ସାନ୍ତି ବାନ୍ ନେନେ ଅସ୍ବିଦା ତିଙ୍ଗିମ୍ୟାକେ ବିନ୍‌ଶ୍ଟେକେ ସାନ୍ତି ବିଃ ନେୟାଏ । ୫ ଡାଗ୍ଲା କିସ୍ଟନେସା ନେନେ ଦୁକ୍ ଜାବର୍ ଦେଡ୍‌ରକମ୍ କ୍ରିଷ୍ଟୁନେ ବାନ୍ ନେନେ ସାନ୍ତି ତିଗ୍ ଜାବର୍ । ୬ ନେନେ ଜଦି ଅସ୍ବିଦା ନେବାଏ ଆଡେନ୍ ପେଇଂନେ ସାନ୍ତି ବାରି ପାପ୍‌ବାନ୍ ରକ୍ୟା ନସା । ନେନେ ସାନ୍ତି ନେବାଲା ପେଇଂ ତିଗ୍ ଦେଡ୍‌ରକମ୍ ସାଆସ୍ ବାବ୍ରେ ଅସ୍ବିଦା ବାନ୍ସା ସାନ୍ତି

✨ ୧:୧ ୧:୧ ପ୍ରେରିତ୍ ୧୮:୧.

ବାରି ବପୁ ପେବାଏ । ୭ ପେଇଁନେ ଡାଗ୍ରା ନେନେ ଆସା ଲେଃକେ । ନେନେ ମ୍ୟାନେଲେକେ ପେଇଁ ନେନେ ଦୁକ୍ କସ୍ତୁନ୍ନିଆ ଡିରକମ୍ ବାଗ୍ ଡିଙ୍ଗ୍‌ପେଲେକେ ଦେଡ଼ରକମ୍ ଆନେକେ ସାନ୍ତି ଡିଗ୍ ବାଗ୍ ପେଡିଙ୍ଗ୍ ।

୮ ✱ବୟାଁ ବାରି ତନାଇଁ ନେନେ ଆସିଆ ପୁଦେସ୍‌ଅରିଆ ନେବାକ୍ କସ୍ତୁ ବିସୟ୍ ଆପେକେ ଆମ୍ୟାନ୍‌ସା ଚାସ୍‌ନେଡିଁକେ । ଆତେନ୍ କସ୍ତୁ ସାମ୍‌ଲେ ନେୟାଲା ନେନେ ପାରାନ୍‌ନେ ଆସା ଆନ୍ତାର୍ ବିନେବକେ । ୯ ଆନେକେ ଗୁଏନେ ତଣ୍ଡ ବିବଆକେଁ ଡାଗ୍‌ତେ ବାବେନେଲେଃକେ । ମାତର୍ ନିଜର୍ ଆଡ଼ାଡ଼ା ଆସା ମାଡିଙ୍ଗ୍‌ତେ ଗୁଏଃକେ ପାରାନ୍ ବିମ୍ୟାକେଁ ଇସ୍‌ପର୍ ଆଡ଼ାଡ଼ା ଆସା ନେବକ୍‌ସା ଏନ୍‌ସାପା ଗଟେଲେଃଟେ । ୧୦ ଦେକ୍‌ରକମ୍ ବୟାକ୍‌ଗ୍ ଗୁଏନେ ବିପଦ୍‌ବାନ୍ ମେଁ ଆନେକେ ଉଦାର୍ ଆଡିଙ୍ଗ୍‌ବକେ ବାରି ଡିଙ୍ଗ୍ । ମେଁ ଆର୍‌ମୁଇଁତର୍ ଆନେକେ ରକ୍ୟା ଡିଙ୍ଗ୍ । ଏନ୍ ଆସା ନେନେ ମେଁନେଡାଗ୍ରା ଲେଃକେ । ୧୧ ପେଇଁ ନିଜର୍ ପାର୍‌ତନା ବାନ୍ ଆନେକେ ସାଇଜ ଡିଙ୍ଗ୍‌ପା । ଗୁଲୁଏରେ ପର୍‌ମେସର୍‌କେ ଦନ୍‌ସବାଦ୍ ବିଏ ଆତେନ୍‌ସା ମେଁଇଁନେ ପାର୍‌ତନା ବାନ୍ ପର୍‌ମେସର୍ ଆନେକେ ଆସ୍ ବାଦ୍ ବିଏ । ନେଇଙ୍ଗ୍ ନ୍‌ସା ମାଲେରୁଆ ଇସ୍‌ପର୍‌ନେ ଡାଗ୍‌ରା ଦନ୍‌ସବାଦ୍ ଡିଙ୍ଗ୍‌ଆର୍‌ଏ ।

### ପାଉଲ୍ ବାବେକ୍ ବଦ୍‌ଲେଏ

୧୨ ମଞ୍ଚପୁର୍‌ନ୍ନିଆ ପାରାନ୍ ବାରି ଏବେ ପେଇଁନେ ଏତେ ନେନେ ବିସ୍‌ବାସ୍ ଇସ୍‌ପର୍ ଡିଆର୍ ଡିଙ୍ଗ୍‌କେ ପବିତ୍ରତା ବାରି ବିସ୍‌ବାସ୍‌ତତାବାନ୍ ଚାଲେଲେଃକେ ଡାଗ୍‌ତେ ନେନେ ବୁଦି ଜେ ସାକି ବିଃଡିଁକେ । ଏନ୍‌ସା ନେନେ ମନ୍‌ନ୍ନିଆ ଗରବ୍ ଡିଙ୍ଗ୍ । ରେମୁଆଁନେ ଗ୍ୟାନ୍‌ନ୍ନିଆ ଶୁ ମାତର୍ ଇସ୍‌ପର୍‌ନେ ଆସିର୍‌ବାଦ୍‌ରେ ଡିଙ୍ଗ୍‌ନ୍‌ସା ନେନେ ଇକ୍‌ଟା ଡିଙ୍ଗ୍‌ନେଲେଃକେ । ୧୩ ମେଃମେଃନେ ପଡେତେ ପେ ବୁଜେ ପେୟାଏ, ପେଇଁନେ ଡାଗ୍ରା ନେନେ ମାତର୍ ଅଃତେନ୍ ଗୁଆର୍‌ନେବକେ । ୧୪ ନେଙ୍ଗ୍ ଆସା ଶ୍ରିଏ ଏବେ ମେଃମେଃନେ ନିମାଣ୍ଡ଼ ବାବ୍‌ରେ ବୁଜେପେଡିଙ୍ଗ୍ ଆତେନ୍ ସାପା ବେଲା ମାପୁ ଜିସୁନେ ଆର୍‌ମୁଇଁତର୍ ପାଙ୍ଗ୍‌ନେ ଦିନା ବଲ୍ ବାବ୍‌ରେ ବୁଜେ ପେୟାଏ

✱ ୧:୮ ୧:୮ ୧ କରିନ୍ତସ୍ ୧:୪:୩୨.

। ତେଲା ପେ ନେନେ ନସା ଗର୍ବ ତାଗ୍‌ରେ ପେବାବେଏ ବାରି ନେନେ ତିଗ୍ ପେ ନସା ଗରବ୍ ନେଡ଼ିଙ୍‌ଏ ।

୧୫ ଆରି ପେଇଂ ତିଡ଼ିକି ମ୍ପାର୍ ତର୍ ଅନୁଗୁଅ ବା ପେୟାଏ  
 ୧୬ ✱ମାସିଦୋନିଆ ଝେନେବେଲା ବାରି ଆଡ଼ବାନ୍ ପାଙ୍‌ନେ ବେଲା  
 ପେଇଂନେ ତାଗ୍ରା ଉଡ଼ି ଦିନ୍ ଲେଃନସା ନେଙ୍‌ନେ କାମ୍ ଲେଃକେ  
 ତାଗ୍ରା ଜିଉଦା ଦେସ୍‌ନିଆ ଝେ ନସା ନେଙ୍‌ ପେଇଂନେ ସାଇଜ  
 ଦରକାର ଲେଃକେ । ୧୭ ନେଙ୍‌ ମେଃମେଃନେ ନେଙ୍‌ନେ ଇକ୍‌ଚା  
 ବାବ୍‌ରେ ଏନ୍ କାମ୍ ଆଃରେ ମ୍‌କେ ? ଜାଣ୍‌ଇଂ ମୁଇଂ ମାଡ଼ରେ “ଆଁ,  
 ଆଁ” ବାରି “ଶୁ, ଶୁ” ତିଙ୍‌ଆରଏ ମେଇଂ ରକମ୍ ମେଃମେଃନେ ନେଙ୍‌  
 ନିଜର୍ ନିମାଣ୍ଡା ନସା ନେଙ୍‌ନେ କାମ୍ ତିଙ୍‌ମ୍‌କେ ? ୧୮ ମାଡ଼ର୍ ଜଦି  
 ପେଇଂ ପର୍‌ମେସର୍‌କେ ବିସ୍‌ବାସ୍ ତିଙ୍‌ପେଡ଼ିଙ୍‌କେ ତେଲା ପେଇଂ  
 ବିସ୍‌ବାସ୍ ତିଙ୍‌ପେୟାଏ ଜେ ନେନେ ମେଃମେଃନେ ନେବାସ୍‌କ୍‌ଏ  
 ଆତାନ୍‌ନେ ଉତର୍ “ଅଁ” ବାରି “ଶୁ” ମ୍‌କ୍‌ଗିଗ୍ ତିଙ୍‌ ଆୟା ଶୁ ।  
 ୧୯ ତାଗ୍ରା ଇସ୍‌ପର୍ ଉଙ୍‌ଡେ ଜିସୁ କିସ୍‌ଟ ଜେ ନେଇଂନେ ବାନ୍ ତାଗ୍ରା  
 ନେଙ୍‌ ବାନ୍ ବାରି ସିଲ୍‌ନା ବାରି ତିମତିନେ ବାନ୍ ପେଇଂନେ ତାଗ୍ରା  
 ବାସ୍‌କ୍ ତିଙ୍‌କେ ମେଁ ଅଁ ବାରି ଶୁ ଆଡ଼ାକେ ଶୁ ବାରି ମେଁନେ ତାଗ୍ରା  
 ଅଁ ତାଗ୍ରାବକେ । ୨୦ ତାଗ୍ରା ପର୍‌ମେସର୍ ଆଣ୍ଡିନେ ସାପା ପର୍‌ମାନ୍  
 ତିଙ୍‌ବକେ ମେଁ କିସ୍‌ଟନେ ତାଗ୍ରା ଆଡେନ୍ ସାପା ଆଣ୍ଡେଙ୍‌ ଅଁ  
 ତିଙ୍‌ଲେକେ । ଆଡେନ୍‌ସା ନେନେ ପର୍‌ମେସର୍‌ନେ ମଇମା ନସା  
 କ୍ରିସ୍‌ଟେ ମ୍‌ରେ “ଆମେନ୍” ତାଗ୍ରାରେ ବାସ୍‌କ୍‌ନେଡ଼ିଙ୍‌ । ୨୧ ନିଜେ  
 ଇସ୍‌ପର୍ ଜିସୁ କିସ୍‌ଟନେ ତାଗ୍ରା ପେଇଂନେ ବାରି ନେନେ ପାରାନ୍‌କେ  
 ମୁଇଂଅରିଆ ଆଡ଼ିଙ୍‌ରେ ରକ୍ୟା ତିଙ୍‌ବକେ । ୨୨ ମେଁ ଆନେକେ  
 ବିନେ ଆଡ଼ିଙ୍‌ବକେ ବାରି ନେନେ ଗାଗ୍‌ଡେନ୍‌ନିଆ ମେଁନେ ପବିତ୍ର  
 ଆମ୍‌କେ ଆନ୍ତାର୍ ବକେ । ପବିତ୍ର ଆମ୍‌ ତିଙ୍‌ଡିଙ୍‌କେ ନେନେ ଆଡ଼ାଡ଼ା  
 ଇସ୍‌ପର୍‌ନେ ଅଦିକାର୍‌ନେ ଚିନା ବାରି ଇଡ଼ିଂଡେ ନେ ମେଃମେଃନେ  
 ନେବାଏ ମେଁନେ ଦାନ୍ ରକମ୍ ।

୨୩ ଇସ୍‌ପର୍ ନେଙ୍‌ନେ ସାକି । ମେଁ ନେଙ୍‌ ଗାଗ୍‌ଡେ ପାର୍‌ମାନ୍  
 ତିଂଡିଂକେ ଜେ, ଆପେକେ ନେଙ୍‌ ତିରକମ୍ ବାରି ବାଦା ନ୍ନାବିଃ  
 ଶୁ, ଆଡେନ୍‌ସା ନେଙ୍‌ନେ କରିନ୍ଧୁ ବାର୍‌ମୁଇଂତର୍ ନାଝେକେ ଶୁ ।

✱ ୧:୧୭ ୧:୧୭ ପ୍ରେରିଡ଼ ୧୯:୨୧.

୨୪ ପେଇଁ ଆଣ୍ଡିନେ ସାମୁଆଁ ବିସ୍ବାସ୍ ପେଡ଼ିଙ୍ଗ୍ ଏନ୍ ବିସ୍ବୟରେ ପେନେ ଆଡ଼ାଡ଼ା ସାସନ୍ ଡିଙ୍ଗ୍ ନସା ନେନେ ଚେସ୍ଟା ନେଡ଼ିଙ୍ଗ୍ କେ ଶୁ ଡାଗ୍ଲା ପେଇଁ ବିସ୍ବାସ୍ ନିଆ ଇକ୍ଟା ଲେ୪କେ । ବାରି ଆପେକେ ମାତର ସୁକ୍ ଆଡ଼ିଙ୍ଗ୍ ନସା ପେଇଁନେ ଏଡେ କୁଡ଼େଚେ ନେ କାମ୍ ତିଁନେଡ଼ିକେ ।

## ୨

୧ ମାତର ପେଇଁନେ ଡାଗ୍ଲା ନେଙ୍ଗ୍ ନେ ଝେନେ ଡିରକମ୍ ବାରମ୍ବୁଇଁତର ଦୁକ୍ ଆଡ଼ିଙ୍ଗ୍ ଶୁ ଏନ୍ ନେଙ୍ଗ୍ ମନ୍ନିଆ ବାବେ ନଲେ୪କେ । ୨ ଆପେକେ ଦୁକ୍ ବିଲା ଆନେଙ୍ଗ୍ ଜାଣ୍ଡେ ସାର୍ଦା ବିଏ ? ଆପେକେ ଆ୪ତାର୍ଚେ ବାରି ଦେଡ଼ରକମ୍ ଜାଣ୍ଡେ ଶୁ । ୩ ବାରି ଜାଣ୍ଡେଇଁନେ ବାନ୍ ନେଙ୍ଗ୍ ନେ ସାର୍ଦା ଡିଙ୍ଗ୍ ନେ ଦରକାର୍ ମେଁଇଁନେ ବାନ୍ ନେଙ୍ଗ୍ ପାଙ୍ଗ୍ ଚେ ଡିରକମ୍ ଦୁକ୍ ଆବା ଶୁ ଏନ୍ ସା ନେଙ୍ଗ୍ ଏନ୍ ସାମୁଆଁ ଗୁଆରମ୍ବୁକେ ଡେସା ନେଙ୍ଗ୍ ନେ ସାର୍ଦାରେ ଜେ ପେଇଁନେ ସାର୍ଦା ଏନ୍ ପେ ସାପାରେନେ ବିସ୍ବୟରେ ନେଙ୍ଗ୍ ନେ ବିସ୍ବାସ୍ । ୪ ମାଲେ ଦୁକ୍ ବାରି କସ୍ ଗାଗ୍ଡ଼େନ୍ନିଆ ଅ୪ ଅ୪ଚେ ନେଙ୍ଗ୍ ଆଣ୍ଡିନେ ଚିଚି ଗୁଆରମ୍ବୁକେ ଆପେକେ ଦୁକ୍ ଆଡ଼ିଙ୍ଗ୍ ନସା ଶୁ ମାତର ଆପେକେ ନେଙ୍ଗ୍ ଉଡ଼ି ଆଲାଦ୍ ତିଁଣ୍ଡିକେ ଏନ୍ ଆମ୍ୟାନେ ଲେ୪ଗେ ଆଡେନ୍ ଚିଚିନେ ବିସ୍ବୟ ।

### ଦସିକେ ଲିବିସ

\* ଜଦି ଜାଣ୍ଡେ ଜାଣ୍ଡେକେ ଦୁକ୍ ବିବଏ ମେଁ ମାତର ନେଙ୍ଗ୍ ମନ୍ନିଆ ଦୁକ୍ ଆବିକେ ଶୁ ଗଣ୍ଡା ଜାବର ଆପେକେ ଡିଗ୍ ଦୁକ୍ ବିବକେ । ଏନ୍ ବିସ୍ବୟରେ ନେଙ୍ଗ୍ ଜାବର ଡାଗ୍ ଡିଙ୍ଗ୍ ନସା ଇକ୍ଟା ନାଡ଼ିଙ୍ଗ୍ କେ ଶୁ । ୨ ପେଇଁନେ ବିଡେ ଉ୪ଡ଼ିରୁଆନେ ଇକ୍ଟା ଅନୁସାରେ ଆଡେନ୍ ରେମୁଆଁକେ ଆଣ୍ଡିନେ ଡଶ୍ ବିବକେ ଆଡେନ୍ ମେନ୍ ସା ଜାବର । ୩ ମେଁ ଡିରକମ୍ ଜାବର ଦୁକ୍ରେ ବାଙ୍ଗେ ଆପଡ଼େ ଶୁ । ଆଡେନ୍ ସା ଏକ୍ରେ ଆମେକେ ଲିବିସ ବାରି ସାନ୍ତି ବି୪ନେ ପେଇଁନେ ଦରକାର୍ । ୪ ଆପେକେ ନେଙ୍ଗ୍ ନେ ଗୁଆରେ ପେଇଁ ଆମେକେ ଆଲାଦ୍ ଡିଙ୍ଗ୍ ଶିଁକେ ଡାଗ୍ ଚେ ଆମ୍ୟାବିପା । ୫ ପେଇଁ ନେଙ୍ଗ୍ ନେ ସାପା ସାମୁଆଁନେ ପାଲନ୍ ଡିଙ୍ଗ୍ ନସା ଇକ୍ଟା ଲେ୪ ଶୁ ଏନ୍ ପରିକ୍ୟା

ଡିଙ୍ଗନ୍‌ସା ନେଙ୍ଗ୍ ଆପେକେ ଗୁଆରମ୍‌କେ ।<sup>୧୦</sup> ଜଦି ପେଇଂ ଜାଣ୍ଡେକେ ଲିବିସ ପେଡିଙ୍ଗ୍‌ସ ନେଙ୍ଗ୍ ଡିଗ୍ ଆମେକେ ଲିବିସ ଶ୍ରିଙ୍ଗ୍‌ସ । ନେଙ୍ଗ୍ ଜଦି ମେଃଡିଗ୍ ବିସୟରେ ଜାଣ୍ଡେକେ ଲିବିସ ଡିଙ୍ଗ୍‌ମ୍‌ସ ଆଡେନ୍ କିସ୍‌ଟନେ ସାମ୍‌ନାନ୍ନିଆ ପେଇଂନେ ଆଡ଼ଲା ଡିଙ୍ଗ୍‌ବସ ।<sup>୧୧</sup> ତେସା ସେଃଆଁରେନେ ବିରଦ୍‌ରେ ମେଃଡିଗ୍ କାମ୍ ଡିଙ୍ଗନ୍‌ସା ସୁଜଗ୍ ଆବା ଶ୍ଟୁ; ନେନେ ସେଃଆଁରେନେ ପାଞ୍ଚେଃନେଇଂ ବିସୟରେ ଜାବର୍ ବଲ୍ ବାବ୍‌ରେ ମ୍ୟାଃନେଲେକେ ।

### ତ୍ରୋୟାନ୍ନିଆ ପାଉଲ୍‌ନେ ସାଦ୍‌ନା

<sup>୧୨</sup> ✧କିସ୍‌ଟନେ ନିମାଣ୍ଡା ସାମ୍‌ନୁଆଁ ବାସଙ୍ଗ୍ ଅଲେଙ୍ଗ୍ ନସା ତ୍ରୋୟା ଦିପ୍‌ନ୍ନିଆ ଖେଚାଚେ ନେଙ୍ଗ୍ ଲେକେ ଏନ୍ କାମ୍ ନସା ମାପୁ ଗାଲି ରଃ ବିଃବକେ ।<sup>୧୩</sup> ମାତର୍ ବୟାଁ ତିତସକେ ଆଡ଼ଅରିଆ ଆଃକେଚେ ନେଙ୍ଗ୍ ତେରେପେତେ ଶ୍ରିଙ୍ଗ୍‌କେ । ତେସା ଆଡ଼ଅରିଆ ରେମ୍‌ନୁଆଁଇଂବାନ୍ ଆନ୍ତାର ବିଚେ ନେଙ୍ଗ୍ ମାସିଦୋନିଆନିଆ ଉଞ୍ଚେକେ ।

### କ୍ରିସ୍‌ଟନେ ବାନ୍ ଜିତେନେ

<sup>୧୪</sup> ଇସ୍‌ପର୍‌ନେ ଦନ୍‌ସବାଦ୍ ଡିଙ୍ଗ୍‌ଲେ । ଡାଗ୍ଲା ମେଁ ଜିସୁ କିସ୍‌ଟନେ ବାନ୍ କାଲାଆଃ ଆନେକେ ଜିତେନେ ଗାଲି ଖା ତୁଙ୍ଗ୍‌ଖେସ । ବାରି ବାସ୍ମା ପିତୁର୍ ପାକା ବିଚେ ବିଃକ୍ଲେ ରକମ୍ କିସ୍‌ଟନେ ଗ୍ୟାନ୍ ବିନ୍‌ଶ୍ଟେକେ ବିନ୍‌ସା ଇସ୍‌ପର୍ ଆନେକେ ବାଃଲିର୍‌ବାଃତା ଡିଙ୍ଗ୍‌ମ୍ୟାକେ ।<sup>୧୫</sup> ଡାଗ୍ଲା ଉଦାର ବାଲେଃକ୍ଲେ ବାରି ନସ୍ତୁ ଡିଙ୍ଗ୍‌କ୍ଲେ ରେମ୍‌ନୁଆଁଇଂନେ ବିତ୍ରେ ନେ ଇସ୍‌ପର୍‌ନେ ମୁଆଃନ୍ନିଆ କିସ୍‌ଟନେ ବାସ୍ମା ରକମ୍ ।<sup>୧୬</sup> ଜାଣ୍ଡେଇଂ ଗୁଏ ଲେଃଆରକେ ମେଇଂନେସା ନେ ଗୁଏନେ ବାସ୍ମା ରକମ୍ ନେଲେକେ । ମାତର୍ ଜାଣ୍ଡେଇଂ ରକ୍ୟା ବା ଲେଃଆରକେ, ନେନେ ମେଇଂନେସା ପାରାନ୍‌ନେ ବାସ୍ମା ନେଲେକେ । ଏଲେଡିଗ୍ ପ୍ରସନ୍ ଏନ୍ ଜେ ଏନ୍ କାମ୍ ଡିଙ୍ଗନ୍‌ସା ଜାଣ୍ଡେ ଇକ୍‌ଟା ?<sup>୧୭</sup> ଗୁଲୁଏ ରେମ୍‌ନୁଆଁ ନିଜର୍ ନିମାଣ୍ଡା ନସା ଇସ୍‌ପର୍‌ନେ ବ୍ଲାଲିର୍ ବାଃଲିର୍‌ବାଃତା ଡିଙ୍ଗ୍‌ଆରସ । ନେନେ ମାତର୍ ଦେଡ଼ରକମ୍ ଶ୍ଟୁ । ଆନେକେ ଇସ୍‌ପର୍ ବେବଲା ନେନେ ବିସ୍‌ବାସ୍ ରକମ୍ ମେଁନେ ଆଦେସ୍ ପାଲନ୍

ନେଡ଼ିଙ୍ଗ୍‌ଏ ବାରି ଇସ୍‌ପରନେ ସାମ୍‌ନାନ୍ନିଆ କିସ୍‌ଟନେ ଗୁଡ଼ିରେ ରକମ୍ ବାସଙ୍ଗ୍ ନେଡ଼ିଙ୍ଗ୍‌କେ ।

## ୩

### ମି ନିୟମନେ ଗୁଡ଼ିରେ

<sup>୧</sup> ନେ ମେଃନେ ବାରି ଆମ୍ବା ବଡ଼ପନ୍ ଡିଙ୍ଗ୍‌ନେ ରକମ୍ ମନେ ଡିଙ୍ଗ୍‌ନେଡ଼ିଙ୍ଗ୍‌କେ ? ଶୁଲା ବିନ୍‌ରେନେ ରକମ୍ ନେ ମେଃନେ ପେନେ ଡାଗ୍ରା ଶୁଲା ପେନେ ଡାଗ୍ରାବାନ୍ ସ୍ନାମୁଆଃ ଉଲିଆ ଦରକାର୍ ଡିଙ୍ଗ୍‌ନେଡ଼ିଙ୍ଗ୍ ? <sup>୨</sup> ପେଇଂ ଆଃ ନେନେ ସ୍ନାମୁଆଁ ଉଲିଆ ନେନେ ଗାଗ୍‌ଡେନ୍ନିଆ ଗୁଆର୍ ବକ୍ଲେ ଲେକା ଜାଣ୍ଡେକେ ସାପାରେ ମ୍ୟାଆର୍‌ଏ ବାରି ପଡେ ଯାଆର୍‌ଏ । <sup>୩</sup> ଏନ୍ ସ୍ନାମୁଆଁ ଉଲିଆ କିସ୍‌ଟନେ ବାନ୍ ସେବାନ୍ନିଆ ଗୁଆର୍‌ବକେ ବାରି ନେ ବାନ୍ ମେଁନେ ଆନ୍ ବକେ । ଏନ୍ ଏଲେଃସବାନ୍ ବି ଆଡାଡା ଗୁଆର୍ ଆବକେ ଶୁ ମାତର୍ ଜିବନ୍ ଇସ୍‌ପରନେ ଆମ୍ବାବାନ୍ ରେମୁଆଁ ଗାଗ୍‌ଡେନ୍ନିଆ ଗୁଆର୍‌ବକେ ।

<sup>୪</sup> ବାରି କିସ୍‌ଟନେ ବାନ୍ ଇସ୍‌ପରନେ ଆଡାଡା ଆସା ବଚେ ନେଁଇଂନେ ଦେକ୍‌ରକମ୍ ବିସ୍‌ବାସ୍ ଲେଃକେ । <sup>୫</sup> ନେ ଜେ ନିଜର୍ ବାନ୍ ମେଃଡିଗ୍ ଆଡାଡା ନ୍‌ସା ବପୁ ଶୁ ମାତର୍ ନେ ବପୁ ଇସ୍‌ପରବାନ୍; <sup>୬</sup> ମି ନିୟମକେ ପାଲନ୍ ଡିଙ୍ଗ୍‌ନେସା ଇସ୍‌ପର୍ ଆନେକେ ସ୍ତ୍ରୀ ବକେ । ଏନ୍ ନିଅମ୍ ଗୁଆର୍‌କ୍ଲେ ଶୁ ମାତର୍ ଆମ୍ବାନେ ବାନ୍ ଗୁଆର୍‌ବକେ; ଡାଗ୍ଲା ଗୁଆର୍‌କ୍ଲେ ନିଅମ୍ ଗୁଏ ଡିଙ୍ଗ୍‌ଏ ମାତର୍ ଆମ୍ବାନେ ନିଅମ୍ ଜିବନ୍ ବିଃଏ ।

<sup>୭</sup> ବି ଆଡାଡା ଗୁଆର୍‌କ୍ଲେ ମସାନେ ନିୟମନେ ତିଆର୍ ବେଲା ଇସ୍‌ପରନେ ମଇମା ନ୍ବା ଲେଃକେ । ଆଡେନ୍ ମଇମା ତାରକିଗ୍ ଲିଗ୍ ଝେଲେଲା ଡିଗ୍ ମସାନେ ତାରକିଗ୍ ସାମୁଆଁ ପାକା ଇସ୍‌ସାଏଲ୍ ରେମୁଆଁଇଂ କେୟା ଆୟା ଆର୍‌କେ ଶୁ । ଆଃଗୁଏନେ ନିଅମ୍ ଜିବି ଦେକ୍‌ରକମ୍ ସନ୍‌ମାନ୍ ଏଡେ ନ୍ବା ଲେଃକେ । <sup>୮</sup> ତେଲା ପବିତ୍ର ଆମ୍ବାନେ ସେବାକାମ୍ ଉଡ଼ି ଜାବର୍ ମଇମା ଆଡ଼ିଙ୍ଗ୍ ଶୁ ? <sup>୯</sup> ଡାଗ୍ଲା ଡିଷ୍ଟ୍ ବାନେ ସେବାକାମ୍ ମଇମାମୟ ଲେଃକେ ତେଲା ଦରମ୍‌ନେ ସେବାକାମ୍ ବାରି ଆରି ଜାବର୍ ମଇମାମୟ ଲେଃକେ । <sup>୧୦</sup> ବାଞ୍ଚିର୍ ସେବାନ୍ନିଆ ମଇମା ଲେଃକେ ମାତର୍ ଜାବର୍ ମଇମାମୟ ମି ସେବା ଏଡେ ସମାନ୍ ଆଡ଼ିଙ୍ଗ୍‌ଲା ଆଡେନ୍ ସେନ୍‌ଗ୍ ମଇମା ମେଃଡିଗ୍ ଶୁ ।

୧୧ ଆଣ୍ଡିନେ ଜତନ୍ ଉଡ଼ି ଦିନ୍ ସାଃଲେଃରେ ଆତେନ୍ ଜଦି ମଇମା ଏତେ ପାଞ୍ଜଲେଃକେ ତେଲା ଏନ୍ ମାତାନେ ଜୁଗ୍ ଲେଃକେ ଜତନ୍ ଜାବର୍ ରୁଦିରେ ତିଙ୍ଗନେ ଜନମ୍‌ବାନ୍ ରୁଦି ତିଂକେ ।

୧୨ ଆତେନ୍ ଆସା ଲେଃଲା ନେନେ ଜାବର୍ ସାହାସ୍ । ୧୩ ନେନେ ମସାନେ ରକମ୍ ଶୁ । ମେଁ ନିଜର୍ ସାମ୍‌ଆଁ ତାତେ ତିରକମ୍ ତା ହୁଂଝେକ୍ ମେଁ ତାରକିଗ୍‌ନେ ଅବସ୍ତା ଇଶ୍ଟାୟେଲ ରେମୁଆଁଇଂ କିକେ ଆୟାଆର୍ ଶୁ । ୧୪ ସତେଆ ମେଁଇଂନେ ମନ୍‌ଆଣ୍ଟେଁ ନସ୍ ତିଙ୍ଗଲେଃକେ । ଏବେ ତିଗ୍ ବାଝିର୍ ନିଅମ୍ ପଡ଼େନେ ବେଲା ମେଁଇଂନେ ସାମ୍‌ଆଃନ୍ନିଆ ତିତା ଲେଃକେ । ଜିସୁ କ୍ରିଷ୍ଟନେ ଏତେ ମିସେରେ ଲେଃନେ ବାନ୍ ମାତର୍ ଆତେନ୍ ତିତି ସ୍ତୁ ଆତିଙ୍ଗବକେ । ୧୫ ମାତର୍ ଦେକ୍‌ରକମ୍ କି ଏକେ ଉଡ଼ିବେଲା ଏନ୍ ରେମୁଆଁଇଂ ମସାନେ ନିୟମକେ ପଡ଼େଆର୍‌ଏ ଆତେନ୍ ତିତି ନ୍‌ସା ମେଇଂ ଆକ୍‌ନେ ଅରଡ଼ ରୁଜେ ଆୟାଆର୍ ଶୁ । ୧୬ ମାତର୍ ମୁଇଂଜା ରେମୁଆଁ ଉଡ଼ିବେଲା ବଲ୍ଲେ ଝେଏ ବାରି ମେଁ ମାପୁନେ ପ୍ଲା ତିଙ୍ଗ୍‌ଏ ଆତେନ୍ ତିତାକ୍‌କେ ରଃ ବିକେ । ୧୭ ମାପୁ ଆମ୍ ତିଙ୍ଗ୍‌ତିକ୍‌କେ “ଆଣ୍ଡିଅରିଆ ମାପୁନେ ଆମ୍ ଲେଃକେ ଆଡ଼ଅରିଆ ମୁକ୍ତି ଲେଃକେ ।” ୧୮ ନେନେ ଗାଗ୍‌ଡେଇଂ ସୁନ୍‌ର୍ ଶୁ । ନେନେ ସାପାରେ ମଇମା ବଦ୍‌ଲେ ତିଙ୍ଗକେ । ନେନେ ମେଁନେ ରକମ୍ ତିଙ୍ଗନେ ନିଜେକେ ବଲ୍ଲେ ନେତିଙ୍ଗକେ । ଏନ୍ ବଦ୍‌ଲେଃନେ ନେନେ ବିତ୍ରେ ଜାବର୍‌ବାନ୍ ଜାବର୍ ମଇମା ହୁଙ୍ଗ୍‌ବିଏ । ଆତେନ୍ ମଇମା ମାପୁନେ ବାନ୍ ବାଲେଃ ।

## ୪

### ତୁବଃ ଙ୍ଗୁଇନ୍ନିଆ ଇସ୍‌ପର୍‌ନେ ଦନ୍

୧ ଇସ୍‌ପର୍‌ନେ ଲିବିସଃରେ ଆନେକେ ଏନ୍ ଜତନ୍ କାମ୍ ବିବଲ୍ଲା ନେନେ ଆକ୍‌ମେକେ ଆନ୍ତାର୍ ନେନେ ବିଗ୍‌ପା । ୨ ଗିଆସନେ ବାରି ଦଦ୍ୟା କାମ୍‌ଆଣ୍ଟେଙ୍ଗ୍ ସାପା ଆନ୍ତାର୍‌ବି ନେବକେ । ନେନେ କୁଟ୍ ନେତିଙ୍ଗକେ ଶୁ ପର୍‌ମେସର୍‌ନେ ବ୍ଲାଲିର୍ ବଲ୍ଲେ ଆତିଂକେ ଶୁ ବାରି ନେନେ ସଡ଼କେ ଦରମ୍ ବାବ୍‌ରେ ଆନ୍ ନେତିଙ୍ଗକେ । ଏନ୍‌ବାନ୍ ରେମୁଆଁଇଂନେ ତାଗ୍‌ା ନେନେ ନିଜର୍ ରେମୁଆଁନେ ରୁଦି ଆସ୍‌ଏ ନେତିଙ୍ଗକେ, ଆଣ୍ଡିନେ ବାନ୍ ସାପାରେ ନିଜର୍ ଗାଗ୍‌ଡେନ୍ନିଆ ମ୍ୟା



ୟାଆର୍ଏ ଜେ, ପରମେସରନେ ସାମନାନ୍ନିଆ ନେ ସତ୍ ବ୍ଲାଲିର୍ ବାସଙ୍ଗ୍ ନେଡିଙ୍ଗ୍‌କେ ।<sup>୩</sup> ଡାଗ୍ଲା ନେନେ ବାନ୍ ବାସଙ୍ଗ୍‌କ୍ଲେ ନିମାଣ୍ଡା ସାମୁଆଁ ଜଦି ଗୁନ୍ ବେକାର୍ ତେଲ୍ଲା ମାତର୍ ନସ୍ ଗାଲି ପାକା ଝେଣ୍ଡେଇଂ ନସା ଆତେନ୍ ଗୁନ୍ ସରାଃ ।<sup>୪</sup> ମେଇଂ ବିସ୍‌ବାସ୍ ଆଡିଙ୍ଗ୍‌ଆର୍ ଶୁ ଡାଗ୍ଲା ମେଁଇଂନେ ମନ୍‌ନ୍ନିଆ ଏନ୍ ମାସ୍ତୁର୍‌ନେ ଦେବ୍‌ତା କାନା ଆଡିଙ୍ଗ୍ ବକେ । ଇଡିଙ୍ଗ୍ ଇସ୍‌ପରନେ କ୍ଲିର୍ ଗାଗଡେ କିସ୍‌ଟନେ ମଇମାମୟ ନିମାଣ୍ଡାସାମୁଆଁନେ ତାର୍‌କିର୍ କିକେ ଆୟାଆର୍ ଶୁ ।<sup>୫</sup> ନେଁ ନିଜେକେ ନେବାସଙ୍ଗ୍ ଶୁ ମାତର୍ କିସ୍‌ଟନେ ମାପୁ ଡାଗ୍‌ଟେ ବାରି ଜିସୁନେ ସା ନିଜେ ନିଜେକେ ପେନେ ସେବକ ଡାଗ୍‌ଟେ ବାସଙ୍ଗ୍ ନେଡିଙ୍ଗ୍‌କେ ।<sup>୬</sup> ଡାଗ୍ଲା ଆଣ୍ଡିନେ ଇସ୍‌ପର୍ ବାସଙ୍ଗ୍‌ବକେ “ଡାଙ୍ଗ୍‌କିର୍ ବିଡ୍ରେ ତାର୍‌କିର୍ ଡିଙ୍ଗ୍‌ଲେଃ” ମେଁ କିସ୍‌ଟନେ ସାମୁଆଁନ୍ନିଆ ନୁକ୍ଲେ ଇସ୍‌ପରନେ ମଇମାମୟ ଗ୍ୟାନେ ତାର୍‌କିର୍ ଆସୁଏ ନସା ନେଁନେ ଗାଗ୍‌ଡେନ୍ନିଆ ତାର୍‌କିର୍ ଆଃଡିଂବକେ ।

<sup>୭</sup> ମାତର୍ ନେନେ ଦରମ୍ ତୁବଃ କ୍ଲୁଙ୍ଗ୍‌ନ୍ନିଆ ଏନ୍ ମାପୁରୁନେ ସମ୍ପତି ବାନେଲେଃକେ । ଏନ୍‌ବାନ୍ ପାର୍‌ମାନ୍ ଡିଙ୍ଗ୍ ଲେଃକେ ଜେ ଦେକ୍‌ରକମ୍ ମ୍ବାବପୁ ନେନେ ଶୁ ମାତର୍ ଇସ୍‌ପରନେ ।<sup>୮</sup> ନେନେ ସାପା ରକମ୍ କସ୍ ବା ନେଡିଙ୍ଗ୍‌କେ ମାତର୍ ଆରେନେଝେକେ ଶୁ । ବେଲ୍ଲା ବେଲ୍ଲା ତେରେପେତେ ଡିଙ୍ଗ୍‌ଝେନେଡିଙ୍ଗ୍‌କେ ମାତର୍ ମ୍ୟାନେୟାକେ ଶୁ ।<sup>୯</sup> ନେନେ କସ୍ ବାନେଲେକେ ମାତର୍ ଇସ୍‌ପର୍ ଆନେକେ ଅଃନା ଆନ୍ତାର୍ ଆବିକେ ଶୁ । ନେନେ ଉଡିତର୍ କସ୍ ବାନେଲେଃକେ ମାତର୍ ନସ୍ ଡିଙ୍ଗ୍ ନେଝେକେ ଶୁ ।<sup>୧୦</sup> ଜିସୁନେ ଜିବନ୍ ଡିରକମ୍ ନେଡାଗ୍ଲା ନୁଏ ଆତେନ୍‌ସା ନେନେ କାଲାଆଃ ନେନେ ଗାଗ୍‌ଡେ ଇଂକେ ଜିସୁନେ ଗୁଏଃକ୍ଲେ ତୁଙ୍ଗ୍ ନେଲେକେ ।<sup>୧୧</sup> ମେଁନେ ଜିବନ୍‌କେ ଏନ୍ ନେଙ୍ଗ୍‌ନେ ଗାଗ୍‌ଡେନ୍ନିଆ ଆନ୍‌ ନସା ଜିସୁ ନସା ସାରା ଜିବନ୍ ନେନେ ଗୁଏନେନ୍ନିଆ ଆଡି ନେଲେକେ ।<sup>୧୨</sup> ଦେକ୍‌ରକମ୍ ବାବ୍‌ରେ ନେନେ ବିଡ୍ରେ ଗୁଏନେ ବାରି ପେନେ ବିଡ୍ରେ ଜିବନ୍ କାମ୍ ଡିଙ୍ଗ୍‌କେ ।

<sup>୧୩</sup> ଦର୍ମ ସାସ୍ତ୍ରନ୍ନିଆ ଗୁଆର୍ ବକେ “ନେଙ୍ଗ୍ ବିସ୍‌ବାସ୍ ଡିଙ୍ଗ୍‌ଲ୍ଲା ସାମୁଆଁ ମ୍ବାସଙ୍ଗ୍‌କେ ।” ନେନେ ଆତେନ୍ ବିସ୍‌ବାସ୍‌ନେ ଆମ୍ବା ବାନେଲେଃକେ । ନେନେ ବିସ୍‌ବାସ୍ ନେଡିଙ୍ଗ୍‌କେ ଆତେନ୍‌ସା ନେନେ ନେବାସଙ୍ଗ୍‌ଏ ।<sup>୧୪</sup> ନେନେ ମ୍ୟାନେଲେକେ ଇସ୍‌ପର୍ ମାପୁ ଜିସୁକେ

ଗୁଏକ୍ଲେବାନ୍ ଜିବନ୍ ଆଡ଼ିଙ୍ଗ୍ ବକେ । ଆଡେନ୍ ଇସ୍ପର୍ ଜିସୁନେ ଏଡେ ଆନେକେ ଡିଗ୍ ଜିବନ୍ ଆଃଡ଼ିଙ୍ଗ୍ ବାରି ପେଇଁନେ ଏଡେ ଆନେକେ ମୈନେ ସାମ୍ନାନ୍ନିଆ ତୁଂଖେଏ । ୧୫ ପେଇଁନେ ମଙ୍ଗଲ୍ ନ୍‌ସା ଏନ୍ ସାପା ଗଟେଡ଼ିଂକେ । ଇସ୍ପର୍ ଲିବିସ ବାରି ଜାବର୍ବାନ୍ ଜାବର୍ ମ୍ଲାଟେ ରେମୁଆଁଇଁକେ ନିମାଣ୍ଡା ଆଡ଼ିଙ୍ଗ୍‌କେ ବାରି ଗୁଲୁଏ ଦନ୍‌ସବାଦ୍ ଏଡେ ଇସ୍ପର୍‌ନେ ମଇମା ଡିଙ୍ଗ୍‌ଆର୍‌ଏ ।

### ବିସ୍‌ବାସନେ ଜିବନ୍

୧୬ ଆଡେନ୍‌ସା ନେନେ ଅଃନା ଡିଗ୍ ନିରାସ୍ ନେଡ଼ିଙ୍ଗ୍ ଶୁ ଏଲେଡ଼ିଗ୍ ନେନେ ଚାଲେଲେଃକ୍ଲେ ଗାଗ୍‌ଡେ ନସ୍ ଡିଙ୍ଗ୍ ଖେଡ଼ିଂକେ ମାତର୍ ନେନେ ବିଡେନେ ଆମ୍ବା ଦିନକେ ଦିନ୍ ମିବାନ୍ ଜାବର୍ ମି ଡିଙ୍ଗ୍‌ଖେଡ଼ିଂକେ । ୧୭ ଏନ୍ ତାଆଁନେ ବାରି ପ୍ରେଗ୍ ନ୍‌ସା ଦୁକ୍‌କସୁନେ ନ୍‌ସା ତୁଙ୍ଗ୍‌ପାଙ୍ଗ୍ ବକେ, ମାପେ ମାୟାନେ କାଲାଆଃ ଲେଃନେ ଗୌରବ୍ ସମ୍ପତି । ୧୮ ତେସା ନେ ନ୍‌କ୍ଲେ ବିସୟ୍ ଆଡ଼ାତ୍ରା ଇକ୍‌ଚା ଆଡ଼ିଙ୍ଗ୍‌ରେ ଆନ୍‌କ୍ଲେ ବିସୟ୍ ଆଡ଼ାତ୍ରା ଇକ୍‌ଚା ଡିଙ୍ଗ୍‌ନେଡ଼ିଙ୍ଗ୍‌କେ; ତାଗ୍ଲା ନ୍‌କ୍ଲେ ବିସୟ୍ ପ୍ରେକ୍ ଆଃ ଲେଃଏ ମାତର୍ ଆନ୍‌କ୍ଲେ ବିସୟ୍ ମାଡାନେ ଜୁଗ୍ ଜାକ୍ ଲେଃଏ ।



୧ ନେ ମ୍ୟାନେଲେକେ ଆଣ୍ଡିନେ ମଞ୍ଚପୁର୍ ଗାଗ୍‌ଡେନେ ରୁପ୍ ତମୁନ୍ନିଆ ନେନେ ବାସା ନେଲେକେ ଆଡେନ୍ ଦଂସ ଡିଙ୍ଗ୍‌ଖେଲ୍ଲା ଆନେକେ ଇସ୍ପର୍ କିତଂନ୍ନିଆ ମୁଇଙ୍ଗ୍ କାଲାଆଃ ନ୍‌ସା ତୁଆ ଆର୍ମେ ବିଏ । ଆଡେନ୍ ରେମୁଆଁ ଆରେକ୍ଲେ ଶୁ ନିଜେ ଇସ୍ପର୍ ଆଡେନ୍ ଆରେ ବକେ । ୨ ଏନ୍ ମଞ୍ଚପୁର୍‌ନ୍ନିଆ ବାସା ଲେଃରେ ନେନେ ଆଡେନ୍ ମାପ୍‌ରୁନେ ତୁଆ ରକମ୍ ପାଟାଇ ଖାଡେଗ୍ ନ୍‌ସା ଅଃନେଡ଼ିଙ୍ଗ୍ । ୩ ମାତର୍ ଆଡେନ୍ କିତଂନେ ତୁଆନ୍ନିଆ ଖେଚାଲା ନେନେ ଗାଗ୍‌ଡେ ଡିଗ୍‌ଚା ନେନ୍‌ଶୁ । ୪ ତାଗ୍ଲା ନେ ଏନ୍ ତମୁନ୍ନିଆ ବାସା ଲେଃରେ ଲିଗିଙ୍ଗ୍ ତୁଙ୍ଗ୍‌ରେ ଅଃନେଡ଼ିଙ୍ଗ୍; ତେସା ନେ ଜେ ମଞ୍ଚପୁର୍ ଆଡ଼ାର୍ ନ୍‌ସା ଇକ୍‌ଚା ନେଡ଼ିଙ୍ଗ୍‌ଏ ଆଡେନ୍ ଶୁ ମାତର୍ ଜିବନ୍ ଡିରକମ୍ ଦର୍‌ଡନିକେ ଦଂସ ଡିଙ୍ଗ୍‌ଏ ଏନ୍‌ସା ଏନ୍ ମଞ୍ଚପୁର୍ ଆଡ଼ାତ୍ରା ବିନ୍ ପାଟାଇ ଖାଡେଗ୍ ନ୍‌ସା ନେ ଇକ୍‌ଚା ନେଡ଼ିଙ୍ଗ୍‌ଏ । ୫ ଇସ୍ପର୍ ଆନେକେ ଏନ୍ ବଦ୍‌ଲେଃନେ ସା

ଆର୍ମେ ତିଙ୍ଗବକେ । ବାରି ଏନ୍ ପାରମାନ୍ ତିଙ୍ଗବକେ ମେଁନେ ପବିତ୍ର ଆମ୍ବାକେ ମେଁ ଆନେକେ ଦାନ୍ ତିଙ୍ଗବକେ ।

<sup>୬</sup> ଆତେନ୍‌ସା ନେନେ ସାପାବେଲା ସାହାସ୍ ସାଃନେଲେକେ । ନେନେ ମ୍ୟାନେଲେକେ ଉଡ଼ି ଦିନ୍ ନେନେ ଆକେନ୍ ଗାଗଡ଼େନ୍ନିଆ ବାସା ନେଲେକେ ଅଃତେନ୍ ଦିନ୍ ମାପୁନେ ତୁଆବାନ୍ ମ୍ଲୁ ଲେଃତେ ରୁଆ ନେଡ଼ିଙ୍ଗକେ <sup>୭</sup> ଡାଗ୍ଲା ନେନେ ଜିବନ୍ ନୁନେ ବିସୟ୍ ଆଡ଼ାଡ଼ା ଶୁ ମାତର୍ ବିସ୍‌ବାସ୍ ଆଡ଼ାଡ଼ା ଆଃରେକ୍ସେ । <sup>୮</sup> ନେ ଏନ୍ ଗାଗଡ଼େବାନ୍ ମ୍ଲୁ ଝେନେସା ବାରି ମାପୁନେ ଡାଗ୍ଲା ତିଙ୍ଗନ୍‌ସା ଜାବର୍ ଇକ୍ତା ନେଡ଼ିଙ୍ଗଏ । <sup>୯</sup> ଆତେନ୍‌ସା ଆକ୍‌ଅରିଆ ନିଜର୍ ତୁଆ ଲାଃଲେ ଶୁଲା ବିନେ ଲାଃଲେ ଇସ୍‌ପର୍‌କେ ସାଦା ଆଡ଼ିଙ୍ଗନେ ନେନେ ମୁଇଁ ଇକ୍ତା । <sup>୧୦</sup> ✨ଡାଗ୍ଲା ନେନେ ସାପାରେକେ ମେଁନେ ବାନ୍ ବିଚାର୍ ତିଙ୍ଗ୍ ନସା ତିଲାତିଗ୍ କିସ୍‌ଟନେ ସାମ୍‌ନାନ୍ନିଆ ଝେନେ ପଡ଼ଏ । ଆତେନ୍ ବେଲା ନିଜର୍ ଗାଗଡ଼େନ୍ନିଆ ନେନେ ତିଙ୍ଗବକ୍ସେ ନିମାଣ୍ଡା ଶୁଲୁ ଦଦ୍ୟା, ସାପା କାମ୍ ସୁଗୁଆ ନେ ପଲ୍ ନେବାଏ ।

ବିନ୍‌ଶ୍ରେକେ ସେବାଡ଼ିଙ୍ଗକ୍ସେ ରେମୁଆଁ ପର୍‌ମେସର୍‌ନେ କୁରୁମ୍ ତିଙ୍ଗଏ

<sup>୧୧</sup> ମାପୁକେ ରୁଟନେ ଅର୍‌ତ ମେଃମେଃନେ ନେନେ ମ୍ୟାନେଲେକେ ବାରି ଏନ୍ ତିଙ୍ଗ୍ ନସା ନେନେ ସାପାରେକେ ରୁଜେ ନେଡ଼ିଙ୍ଗକେ । ଇସ୍‌ପର୍ ନେନେ ସାପାରେକେ ନିମାଣ୍ଡା ବାବ୍‌ରେ ମ୍ୟାଲେଃକେ । ନେଙ୍ଗ୍ ଆସା ତିଙ୍ଗ୍‌ଶ୍ରିଂକେ ପେଇଁ ଆନେଙ୍ଗ୍ ନିମାଣ୍ଡା ବାବ୍‌ରେ ମ୍ୟାପା । <sup>୧୨</sup> ନେ ବାରି ମୁଇଁତର୍ ପେନେ ଡାଗ୍ଲା ଆମ୍‌ବାଡ଼ପନ୍ ତିଙ୍ଗନ୍‌ସା ଚାଏଁନେଡ଼ିଙ୍ଗକେ ଶୁ । ବାରି ନେନେ ସମ୍‌କର୍‌ନ୍ନିଆ ଜାବର୍ ବାବ୍‌ରେ ଗର୍‌ବ୍ ତିଙ୍ଗନ୍‌ସା ଆପେକେ ସୁଜଗ୍ ବିଃନେ ନେନେ ଅଦିକାର୍ । ତେଲା ମାଡାନେ ଗୁନ୍ ମାକେଟେ ମାତର୍ ଚାଲେଲେଃକ୍ସେ ଗର୍‌ବ୍‌ରେ ଇକ୍ତା ତିଙ୍ଗ୍‌ଟେ ଜାଣ୍ଟେଇଁ ଗର୍‌ବ୍ ତିଙ୍ଗ୍‌ଆର୍‌ଏ ଆମେଇଁକେ ପେଇଁ ସମାନ୍ ବାବ୍‌ରେ ଉତର୍ ବିପେୟାଏ । <sup>୧୩</sup> ନେନେ ଜଦି ବାୟା ଆତେନ୍ ପର୍‌ମେସର୍‌ନେ ନସା । ଜଦି ନେନେ ଟିକ୍ ମନ୍‌ନ୍ନିଆ ନେଲେକେ ଆତେନ୍ ପେଇଁ ନସା । <sup>୧୪</sup> କିସ୍‌ଟନେ ଆଲାଦ୍‌ବାନ୍ ନେନେ ଚାଲେନେଡ଼ିଂକେ । ନେନେ ରୁଜେ ନେଡ଼ିଙ୍ଗ୍ ଜେ ମୁଇଁଜା

✨ ୫:୧୦ ୫:୧୦ ରମିୟ ୧୪:୧୦.

ସାପାରେନେ ସା ଗୁଏ ଲେଃଲୀ ସାପାରେ ଆତେନ୍ ଗୁଏନେ ବାଗ୍ ଡିଙ୍ଗ୍‌ଲେଆରକେ । <sup>୧୫</sup> ମେଁ ସାପାରେନେ ସା ଗୁଏ ଲେଃଲୀ ଜାଣ୍ଡେଇଁ ଜିବନ୍ ଲେଃଆରକେ ମେଇଁ ବାରି ନିଜର୍ ନସା ଜିବନ୍ ଆସାଚେ ମେଁନେ ସା ବୁଆଆରଏ ଡାଗ୍ଲା ମେଁଇଁନେ ସା ମେଁ ଗୁଏଚେ ବାର୍‌ମୁଇଁତର୍ ଜିବନ୍ ଡିଙ୍ଗ୍ ଲେଃକେ ।

<sup>୧୬</sup> ତେସା ନେନେ ବାରି ଜାଣ୍ଡେକେ ରେମୁଆଁ ମୁଆଃନ୍ନିଆ ବିଚାର୍ ନେଡିଙ୍ଗ୍ ଶୁ । ବେଲା ଲେଃରେ ଉଡିବେଲା ନେନେ କିସ୍‌ଟକେ ଡିଗ୍ ରେମୁଆଁ ମୁଆଃନ୍ନିଆ ବିଚାର୍ ଡିଙ୍ଗ୍‌ନେଡିଁକେ । ମାତର୍ ଏବେ ନେନେ ବାରି ଦେଡରକମ୍ ନେଡିଙ୍ଗ୍‌କେ ଶୁ । <sup>୧୭</sup> ତେସା ଜଦି ଜାଣ୍ଡେ କିସ୍‌ଟନେ ଡାଗ୍ଲା ଲେଃକେ ତେଲା ମେଁ ମିଁ ତିଆର୍ ଡିଙ୍ଗ୍‌ଲେକେ; ବାଞ୍ଜିର୍ ବିସୟ୍ ସାପା ନସ୍ତୁ ଡିଙ୍ଗ୍ ଝେଲେଃକେ କେଲାପା ମିଁ ବିସୟ୍ ସାପା ଡିଙ୍ଗ୍‌ଲେକେ । <sup>୧୮</sup> ଏନ୍ ସାପା ଇସ୍‌ପରନେ କାମ୍ । ମେଁ କିସ୍‌ଟନେ ବାନ୍ ଆନେକେ ମେଁନେ ଏତେ ସାନ୍ତି ଆଃରେବକେ ବାରି ମେଁନେ ଏତେ ବିନ୍‌ଶ୍ଟେନେ ସାନ୍ତି ଆଃରେନେ ନସା ମେଁ ଆନେକେ ଦାଇଡ୍ ବିବକେ । <sup>୧୯</sup> ତେସା ନେନେ ବ୍ଲାଲିର୍ ଡିଙ୍ଗ୍‌ଡିଙ୍ଗ୍ ଇସ୍‌ପର୍ କିସ୍‌ଟନେ ବାନ୍ ସାପା ରେମୁଆଁ ଜାଡିକେ ମେଁନେ ଏତେ ସାନ୍ତି ତିଆର୍ ଡିଙ୍ଗ୍‌ନସା ନିଅମ୍ ଡିଙ୍ଗ୍‌ବକେ । ମେଁନେ ବିରଦ୍‌ରେ ମେଁଇଁନେ ବୁଲ୍ ସାପାକେ ମେଁ ବାରି ମେଁନେ ଇସାବ୍‌ରେ ଆବକେ ଶୁ । ବାରି ଏନ୍ ସାନ୍ତି ତିଆର୍ ବ୍ଲାଲିର୍ ବାସଙ୍ଗ୍‌ନେ ଦାଇଡ୍ ନେନେ ଆଡାଡା ଅଦିକାର୍ ଲେଃକେ ।

<sup>୨୦</sup> ତେସା ନେନେ କିସ୍‌ଟନେ ଏତେ ଏନ୍ ସାମୁଆଁ ବାସଙ୍ଗ୍‌ନେଡିଙ୍ଗ୍‌କେ । ନିଜେ ଇସ୍‌ପର୍ ନେନେ ବାନ୍ ଏନ୍ ଝାବକେ । କିସ୍‌ଟନେ ପାକା ନେନେ କୁସାମୁଡି ନେଡିଙ୍ଗ୍‌ଏ ଇସ୍‌ପର୍ ସତୁଡାବାନ୍ ସାଙ୍ଗ୍ ଡିଙ୍ଗ୍‌ନେ ବଦ୍‌ଲେପା । <sup>୨୧</sup> ନେନେ କିସ୍‌ଟନେ ସା ନେବାସଙ୍ଗ୍‌ଏ । କିସ୍‌ଟନେ ମେଃଡିଗ୍ ପାପ୍ ଆଲେଃକେ ଶୁ । ଇସ୍‌ପର୍ ଆମେକେ ନେନେ ନସା ପାପ୍ ରକମ୍ ଡିଙ୍ଗ୍‌କେ ନେନେ ତିରକମ୍ ମେଁନେ ଏତେ ମିସୁଚେ ଇସ୍‌ପର୍‌ନେ ଦରମ୍‌ନେ ବାଗ୍ ଡିଙ୍ଗ୍ ନେୟାଏ ।



<sup>୧</sup> ଇସ୍‌ପର୍ ନସା ମୁଇଁଅରିଆ କାମ୍ ଡିଙ୍ଗ୍‌ବଲା ନେନେ ଆପେକେ କୁସାମୁଡି ଡିଙ୍ଗ୍‌ନେଡିଙ୍ଗ୍‌କେ ପେନେ ଜିବନ୍‌ନ୍ନିଆ ଇସ୍‌ପର୍‌ନେ ଲିବିସ

ସରାଃ ଆଡ଼ିଙ୍ଗପା ।<sup>୨</sup> ଡାଗ୍ଲା ପରମେସର ବାସଙ୍ଗଡ଼ିଂକେ:

“ପେଇଂନେ ଆଡାଡା ଲିବିସ ତିଙ୍ଗନେ  
ବେଲା ପାଙ୍ଗଲା

ନେଙ୍ଗ ପେଇଂନେ କୁସାମୁଡ଼ି ଡ଼କେ

ଉଦାର ବାନେ ଦିନ୍‌ନ୍ନିଆ ପେନେ ସାଇଜ ଶ୍ରିଙ୍ଗକେ ।”

ଦ୍ରିଗପା ଏନ୍ ତିଙ୍ଗକେ ଇସପରନେ ଲିବିସ ବ୍‌ବାନେ ବେଲା । ଏକେ  
ତିଙ୍ଗକେ ଉଦାର ବାନେ ଦିନ୍ ।

୩ ଡିରକମ୍ ନେଂଲଂନେ ସେବାପଦ୍ ନିନ୍ଦା ଆଡ଼ିଙ୍ଗ ଶୁ ଆଡେନ୍‌ସା  
ନେ ମେଃଡିଗ୍ ବିସୟନ୍ନିଆ ବାଦା ଆଡ଼ିଙ୍ଗ ଶୁ<sup>୪</sup> ବାରି ନେନେ  
ସାପା ଅବସ୍ତାନ୍ନିଆ ନିଜେକେ ଇସପରନେ ସେବାରେ ରକମ୍ ସ୍ନାମୁଆଁ  
ଆଃଡ଼ିଙ୍ଗନେଡ଼ିଙ୍ଗକେ । ଗୁଲୁଏ ଡାଟ୍ ସାଇଜନ୍ନିଆ ନେନେ ସାପା  
ରକମ୍ କସ୍ ମ୍ନା ଜାମ୍‌ଲା ବାରି ଦଦ୍ୟା ସାମୁଆଁ ସାମ୍‌ଲେ ନେଝେକେ;  
\* ଆନେକେ ବଗ୍‌ବଆରକେ ଜେଲ୍ ଡୁଆନ୍ନିଆ ବଆରକେ । ରେମୁଆଁ  
ନେନେ ବିରଦ୍‌ରେ ବାସଙ୍ଗବକେ । ନେ ଜାବର୍ କସ୍ ତିଙ୍ଗନେବକେ,  
ନେ ଲେମୁଆଁଃ ଲେଃନେମ୍ୟାକେ ବାରି କେଡେସଃ ଲେଃନେମ୍ୟାକେ  
।<sup>୬</sup> ନେନେ ପବିତ୍ରତା ଗ୍ୟାନ୍ ଡାଟ୍ ଲିବିସଃ କୁଟ୍‌ଶୁନେ ଆଲାଦ୍  
ବାରି ସଡ଼ନେ କବର୍ ନ୍ୟା ପବିତ୍ର ଇସପରନେ ବପୁ ବାନ୍ ନେନେ  
ଇସପରନେ ସେବାରେ ଡାଗ୍‌ରେ ସ୍ନାମୁଆଁ ବିନେଡ଼ିଙ୍ଗ ।<sup>୭</sup> ସଡୁଇଂନେ  
ବିରଦ୍‌ରେ ରିଙ୍ଗ୍ ନ୍ୟା ଦରମ୍ ନେନେ ମ୍ନା ଅସ୍ତ ।<sup>୮</sup> ନେନେ  
ସନ୍‌ମାନ୍ ବାରି ଅପ୍‌ମାନ୍ ତିଙ୍ଗନେଲେଃକେ ନାଲେରେ ବାରି ଲାଞ୍ଚୁଆ  
ଡ଼ିଙ୍ଗନେଲେଃକେ । ଆନେକେ ମିଟ୍ ଡାଗ୍‌ରେ ଅପ୍‌ମାନ୍ ବିଃବଆରକେ  
ଏଲେଡିଗ୍ ନେନେ ସଡ଼ ବାସଙ୍ଗ ନେବକେ ।<sup>୯</sup> । ନେନେ ସ୍ନାମୁଆଁ  
ଡ଼ିଙ୍ଗବେଲା ଡିଗ୍ ସ୍ନାମୁଆଁ ଶୁ ଆନେକେ ଗୁଏଗେ ଡାଗ୍‌ରେ ବାସଙ୍ଗ  
ଆରଡ଼ିଂକେ ମାଡର୍ ନେନେ ଜିବନ୍ ନେଲେକେ । ଆନେକେ ଡଣ୍ଡ  
ବିବ ଆରକେ ମାଡର୍ ବାଗୁଏଃଏ ଆବିଆରକେ ଶୁ ।<sup>୧୦</sup> ନେ ଜାବର୍  
ଦୁକ୍ ଲେଃକେ ମାଡର୍ ନେ କାଲାଆଃ ସାଦ୍‌ରେ ନେଲେଃଏ । ନେ  
ଗରିବ୍ ମାଡର୍ ଗୁଲେରେକେ ସାକାର ନେରାଡ଼ିଙ୍ଗଏ । ନେ ମେଃଡିଗ୍  
ଶୁ ମାଡର୍ ନେନେ ସାପା କିଚି ଲେଃକେ ।

☆ ୬:୫ ୬:୫ ପ୍ରେରିଡ଼ ୧୭:୨୩.

୧୧ ଅ କରିନୁନେ ପ୍ରିଅ ତନା ବୟାଁଇଂ ନେନେ କୁଲାକୁଲି ମନ୍ରେ ଆପେକେ ସାପା ବାସଙ୍ଗନେବକେ । ନେନେ ଆପେକେ ମାଲେ ବଲ୍ ବା ନେଡିଙ୍ଗକେ । ୧୨ ନେନେ ପେନେ ଆଡ଼ାତ୍ରା ନେନେ ଆଲାଦ୍ ବନ୍ଦ୍ ଆଡିଙ୍ଗ ନେବକେ ଶୁ । ମାତର୍ ପେଇଂ ନେନେ ଆଡ଼ାତ୍ରା ଆଲାଦ୍ ବନ୍ଦ୍ ଆଡିଙ୍ଗ ପେବକେ । ୧୩ ଆପେକେ ନେଙ୍ଗନେ ଗଡ଼େଅ ମନେ ଡିଙ୍ଗତେ ଏନ୍ ସାପା ବାସଙ୍ଗଣ୍ଡିଂ । ଦରକାର୍ ଦାନ୍ ବାଦୁଲ୍ ଦାନ୍ ରକମ୍ ପେଇଂ ଡିଗ୍ ନିଜର୍ ଗାଗଡ଼େ ନେନେ ସା ସମାନ୍ ବାବ୍ରେ ରଝବନେ ଦରକାର୍ ।

**ବିଜାତିଇଂନେ ବିସୟରେ ତରକ୍ ସାମୁଆଁ**

୧୪ ଜାଣ୍ଟେଇଂ କ୍ରିଷ୍ଟନେ ତାଗ୍ରା ବିସବାସ୍ ଆଡିଙ୍ଗଆର୍ ଶୁ ମେଇଂ ଏତେ ସମାନ୍ ବାବ୍ରେ କାମ୍ ଡିଙ୍ଗ୍ ନସା ଚେସ୍ଟା ଆଡିଙ୍ଗପା । ଏନ୍ ଅଝନାଡିଗ୍ ଆଡିଙ୍ଗ୍ ଶୁ । ଦରମ୍ ବାରି ଅଦରମ୍ ମୁଇଂଅରିଆ ଆଲେଝ ଶୁ ? ତାରକିଗ୍ ବାରି ତାଙ୍ଗକିଗ୍ ଡିରକମ୍ ମୁଇଂଅରିଆ ଲେଝଏ ? ୧୫ କିସର୍ ବାରି ସଏତାନ୍ ଡିରକମ୍ ମୁଇଂଅରିଆ ଡିଙ୍ଗଏ ? ବିସବାସି ଏତେ ଅବିସବାସି ଆଣ୍ଟିନେ ବିସୟରେ ମୁଇଂଅରିଆ ଡିଙ୍ଗଆର୍ଏ ? ୧୬ ❖ଇସ୍ପପର୍ନେ ମନ୍ଦିର୍ନିଆ ଡିରକମ୍ ମୁଡ଼ି ତିଆର୍ ଡିଙ୍ଗଏ ? ନେ ଜିବନ୍ ଇସ୍ପପର୍ନେ ମନ୍ଦିର୍ ତାଗ୍ରା ଇସ୍ପପର୍ ନିଜେ ବାସଙ୍ଗବକେ “ନେଙ୍ଗନେ ରେମୁଆଁଇଂ ଏତେ ନେଙ୍ଗ ବାସା ଲ୍ଲେଝଏ

ବାରି ମେଁଇଂନେ ବିଡ୍ରେ ଲ୍ଲେଝଏ;

ନେଙ୍ଗ ମେଁଇଂନେ ଇସ୍ପପର୍ ଶ୍ରିଙ୍ଗଏ

ବାରି ମେଇଂ ନେଙ୍ଗନେ ନିଜର୍ ରେମୁଆଁ ଡିଙ୍ଗଏ ।”

୧୭ ତେସା ମାପୁ ବାସଙ୍ଗଡ଼ିଂକେ

“ମେଁଇଂନେ ବିଡ୍ରେବାନ୍ ପେ ତାର୍ଚେ ପାଙ୍ଗ୍ଲାପା ମେଇଂନେବାନ୍ ନିଜେକେ ବିନେ ଆଡିଙ୍ଗପା ।

ଦରକାର୍ ଶୁନେ ବିସୟ ଏତେ ସମ୍ପର୍କ୍ ଆବଗେପା

ତେଲା ନେଙ୍ଗ ଆପେକେ ଗ୍ରୁଅନ୍ ଶ୍ରିଙ୍ଗଏ

୧୮ ନେଙ୍ଗ ପେଇଂନେ ଆବା ଶ୍ରିଙ୍ଗଏ

ବାରି ପେଇଂ ପେଡିଙ୍ଗଏ ନେଙ୍ଗନେ ଗଡ଼େଇଂ

ସାପାରୁ ବପୁନେ ମାପୁରୁ ଏନ୍ ସାମୁଆଁ ବାସଙ୍ଗଏ ।”

❖ ୬:୧୬ ୬:୧୭ ୧ କରିନତିୟ ୩:୧୬; ୬:୧୯.



୧ ଅ ବୟାଁ ଆରି ତନାଇଂ, ଏନ୍ ସାପା ପାର୍ମାନ ନେ ଇସ୍ପର୍ତ୍ତନେ ବାନ୍ ବାନେଲେଃକେ । ତେସା ପାଙ୍ଗ୍‌ଲାପା ଗାଗ୍‌ଡେ ବାରି ଆମ୍ବାକେ ଦଦ୍ୟା ଡିଙ୍ଗ୍‌ମ୍ୟାକ୍ଲେ ସାପା ବିସ୍‌ୟ୍‌ବାନ୍ ନିଜେ ନିଜେକେ ପର୍ତ୍ତଲ୍ ନେଡିଙ୍ଗ୍‌ପା । ବାରି ଇସ୍ପର୍ତ୍ତକେ ବୁଟ୍‌ରେ ସମାନ୍ ପବିତ୍ର ରକମ୍ ବାସା ନେଃଲେପା ।

### ପାଉଲ୍‌ନେ ମ୍ଲେଡିଆ

୨ ପେଇଂନେ ଗାଗ୍‌ଡେନ୍ନିଆ ଆନେକେ ଜାଗା ବିଃପା । ନେନେ ଜାଣ୍ଡେନେ ଆଡାଡା ଅନ୍ୟାୟ୍ ନେଡିଙ୍ଗ୍‌କେ ଶୁ ଜାଣ୍ଡେନେ ମେଃଡିଗ୍ ନସ୍ ନେଡିଙ୍ଗ୍‌କେ ଶୁ ଶୁଲା ଜାଣ୍ଡେନେବାନ୍ ମେଃଡିଗ୍ ପାଇଦା ଉଚେନ୍‌ସା ଚେସ୍‌ଟା ନେଡିଙ୍ଗ୍‌କେ ଶୁ । ୩ ଆପେକେ ଦସ୍ ବିନ୍‌ସା ନେଙ୍ଗ୍ ଏନ୍ ସାମ୍‌ଆଁ ବାସଙ୍ଗ୍ ନାଡିଙ୍ଗ୍‌କେ ଶୁ । ନେଙ୍ଗ୍ ସେନ୍‌ଗ୍ ବାସଙ୍ଗ୍‌ମ୍‌କେ, ପେଇଂ ନେନେ ଅଃକେନ୍ ଇକ୍‌ଟା ଜେ ନେଃ ନେଃମ୍‌ଲା ମୁଇଂଅରିଆ ନେଃମ୍‌ପା ବାରି ଗୁଏଃଲା ମୁଇଂଅରିଆ ନେଃଗୁଏଃପା । ୪ ପେଇଂନେ ଆଡାଡା ନେଙ୍ଗ୍‌ନେ ମାଲେ ବିସ୍‌ବାସ୍ ଲେଃକେ । ପେଇଂନେ ସା ନେଙ୍ଗ୍‌ନେ ଗରବ୍ ଡିଗ୍ ଜାବର୍ । ଦୁକ୍ କସ୍ ବେଲା ନେଙ୍ଗ୍ ଗୁଲ୍‌ଏ ସାହାସ୍ ଆଃସୁଏମ୍‌କେ । ସାଦାରେ ଲାଡ୍ୟା ଝେଣ୍ଡିଙ୍ଗ୍ ।

୫ \*ଦେକ୍‌ରକମ୍ କି ମାସିଦୋନିଆନିଆ ଝେଟାଚେ ଡିଗ୍ ନେପୁଣ୍ଡେକେ ଶୁ । ସାପା ଡାଗ୍ରା ସାନ୍ତି ଶୁ ବାରି ବିଡ୍‌ରେ ବୁଟ୍‌ମେଗ୍, ତେକ୍‌ରକମ୍ ସାପା ରକମ୍ କଲ୍‌କଲା ଲାଗେ ଲେଃଗେ, ତେସା ନେନେ ଗାଗ୍‌ଡେନ୍ନିଆ ସାନ୍ତି ଆଲେଃଗେ ଶୁ । ୬ ମାତର୍ ଗାଡ୍‌ସୁ ରେମ୍‌ଆଁକେ ସାନ୍ତି ବିମ୍ୟାକ୍ଲେ ଇସ୍ପର୍ତ୍ତ ଡିତସ୍‌କେ ବେଚେ ଆନେକେ ସାନ୍ତି ବିବକେ । ୭ ମାତର୍ ମେଁନେ ପାଙ୍ଗ୍‌ନେ ବାନ୍ ଶୁ ମାତର୍ ମେଁ ପେଇଂନେ ଡାଗ୍ରା ଝେଚେ ଆଣ୍ଡିନେ ସାନ୍ତି ବାଲେଃକେ ଆଡ୍‌ବାନ୍ ନେନେ ସାଦା ଡିଙ୍ଗ୍‌ନେଲେଃକେ । ଆନେଙ୍ଗ୍ କେନ୍‌ସା ପେଇଂନେ ଉଡି ଇକ୍‌ଟା ନେଙ୍ଗ୍ ନ୍‌ସା ପେନେ ଉଡି ଦୁକ୍ ଆନେଙ୍ଗ୍ ସାପର୍ ଡିଙ୍ଗ୍‌ନ୍‌ସା ପେ ଉଡି ତେରେପେତେ ଏନ୍ ସାପା ବିସ୍‌ୟ୍ ମେଁ ଆନେଙ୍ଗ୍ ଆମ୍ୟାବକେ । ଇଡିଙ୍ଗ୍ ନେଙ୍ଗ୍ ଜାବର୍ ସାଦା ଶ୍ରିଙ୍ଗ୍‌କେ ।

☆ ୭:୫ ୭:୫ ୨ କରିନ୍ତୀୟ ୨:୧୩.

୮ ନେଙ୍କନେ ଚିଚି ପଡ଼େତେ ପେଇଂ ଦୁକ୍ ତିଙ୍ଗପେଲେଃଲୀ ଡିଗ୍  
 ଆତେନ୍ ଉଲିଆଃ ଗୁଆର୍ ବଲ୍ଲା ନେଙ୍କ୍ ମନ୍ନିଆ ମେଃଡିଗ୍ ଦୁକ୍  
 ଶୁ । ଉଲିଆଃ ଆପେକେ ପ୍ରେଗ୍ ନ୍ୟା ଦୁକ୍ ତିଗ୍ ବଲ୍ଲା ନେଙ୍କ୍ ଦୁକ୍  
 ମାଡିଙ୍ଗ୍ । ୯ ମାତର୍ ପେନେ ମନ୍ନିଆ ଦୁକ୍ ବିବଲ୍ଲା ଶୁ ମାତର୍  
 ଏନ୍ ଦୁକ୍ ପେଇଂନେ ଜିବନ୍ନେ ମନ୍ ବଲ୍ଲେ ବିବଲ୍ଲା ଏବେ ନେଙ୍କ୍  
 ସାର୍ଦା ତିଙ୍ଗ୍ଶିଂକେ । ଇସ୍ପରନେ ଇକ୍ତା ରକମ୍ ପେଇଂ ଏନ୍ ଦୁକ୍  
 ବାପେଲେକେ । ତେସା ନେନେ ବାନ୍ ପେଇଂ ମେଃଡିଗ୍ ରକମ୍  
 ନସ୍ ପେଡିଙ୍ଗକେ ଶୁ । ୧୦ ତାଗ୍ଲା ଇସ୍ପରନେ ଇକ୍ତା ଅନୁସାରେ  
 ଆଣ୍ଡିନେ ଦୁକ୍ ବାନ୍ ଉଦାର୍ ପେବାକେ ବାରି ମନ୍ ବଲ୍ଲେ ପେଡିଙ୍ଗକେ  
 ଆତେନ୍ସା ଦୁକ୍ ତିଙ୍ଗ୍ନେ ଦରକାର୍ ଶୁ । ମାତର୍ ସଂସାରନେ  
 ଦୁକ୍ ଗୁଏନେ ତୁଙ୍ଗପାଙ୍ଗ୍ଏ । ୧୧ କେଲାପା, ଇସ୍ପରନେ ଇକ୍ତା  
 ଅନୁସାରେ ପେଇଂ ଆଣ୍ଡିନେ ଦୁକ୍ ପେବାକେ ଆତେନ୍ ପେଇଂନେ  
 ମନ୍ନିଆ ଉଡି ଇକ୍ତା ଉଡି ରୁଟ୍ ଉଡି ସାର୍ଦା ନେନେ ଏତେ ମିସେନ୍ସା  
 ପେଇଂନେ ବିତ୍ତେ ଇକ୍ତା ଜାଗ୍ରଡ୍ ତିଙ୍ଗ୍ ବକେ । ଏନ୍ ଆପେକେ  
 ଜାବର୍ ଅପେଃ ତିଂକେ । ଏନ୍ ଆପେକେ ନ୍ୟାୟ୍ ବିବକେ । ପେଇଂ  
 ସାପା ସାମୁଆଁକେ ପର୍ମାନ୍ ତିଙ୍ଗ୍ ବିପେବକେ ଜେ ପେଇଂ ଆତେନ୍  
 ଜାମ୍ଲାନେ ମେଃଡିଗ୍ ଇଃକୁଡା ନ୍ୟା ତିଗ୍ ଦସ୍ ଶୁ ତ୍ତାଗ୍ତେ ପାର୍ମାନ୍  
 ବିଃପେବକେ ।

୧୨ ପେଇଂନେ ବିତ୍ତେ ଜା ଅନ୍ୟାୟ୍ ତିଙ୍ଗ୍ବକେ ବା ଜା ଅନ୍ୟାୟ୍  
 ସାମ୍ଲାଲେକେ ମେଁନେ ଉଦେସ୍ରେ ନେଙ୍କ୍ ଆତେନ୍ ଚିଚି ଗୁଆର୍  
 ନାବକେ ଶୁ । ବାରି ଇସ୍ପରନେ ମୁଆଃନ୍ନିଆ ନେନେ ଆଡାଡା  
 ପେନେ ବକ୍ତି ଉଡି ସ୍ତ୍ରୀ ବାରି । ୧୩ ଆତେନ୍ସା ନେନେ ଉଡି  
 ସାର୍ଦା ଆତେନ୍ ଆମ୍ୟାବିନ୍ସା ନେଙ୍କ୍ ଆତେନ୍ ଚିଚି ଗୁଆର୍ମ୍ଲେ  
 ମାତର୍ ସାର୍ଦା ନେଡିଙ୍ଗକେ ଶୁ । ପେଇଂ ତିତସ୍ରେ ସାପା ରକମ୍  
 ସାଇଜ ତିଙ୍ଗ୍ତେ ତିରକମ୍ ବାବ୍ରେ ସାର୍ଦା ତିଙ୍ଗ୍ପେବକେ ଆତେନ୍  
 ଆନେକେ ଜାବର୍ ସାର୍ଦା ବିବକେ । ୧୪ ମେଁନେ ତାଗ୍ଲା ପେଇଂନେ  
 ସା ନେଙ୍କ୍ ବଡ୍ପନ୍ ତିଙ୍ଗ୍ମ୍ଲେକେ । ବାରି ଆତେନ୍ସା ନେଙ୍କ୍ ବାଆଃ  
 ଆଲ୍ ତିଙ୍ଗ୍ ଆଞ୍ଜେକେ ଶୁ । ତିରକମ୍ ପେଇଂନେ ତାଗ୍ଲା ନେନେ  
 କାଲାଆଃ ସଡ୍ ବାସଙ୍ଗ୍ ପାଙ୍ଗ୍ନେଡିଙ୍ଗକେ ଦେଡ୍ରେକମ୍ ତିତସ୍ରେ  
 ତାଗ୍ଲା ନେନେ ତିଙ୍ଗ୍ ନେବକ୍ଲେ ବଡ୍ପନ୍ ମିର୍ ତାଗ୍ତେ ପର୍ମାନ୍



ଆଡ଼ିଙ୍ଗକେ ଶୁ । ୧୫ ପେଇଁ ସାପାରେ ତିରକମ୍ ବାବରେ ମେଁନେ ବାଦ୍ୟ ତିଙ୍ଗପେଲେକେ ବାରି ବୁଟ ବାରି ଜୁରତେ ଗାଗଡ଼େନ୍ନିଆ ଆମେକେ ଗୁଅନ୍ ତିଙ୍ଗପେବକେ ଏନ୍ ସାମୁଆଁ ଏତେତେ ପେଇଁନେ ଆଡ଼ାତ୍ରା ମେଁନେ ଆଲାଦ୍ ବାରି ମ୍ଲା ଝେଗେ । ୧୬ ପେଇଁନେ ଆଡ଼ାତ୍ରା ଆସା ବନେ ଯାଲା ନେଙ୍ଗ ଉଡ଼ି ସାଦା ।

## ୮

### କ୍ରିଷ୍ଟାନ୍‌ଇଁନେ ଦାନ୍

୧ ✧ ବୟାଁ ବାରି ତନାଇଁ ମାସିଦୋନିଆନେ ମଶୁଲିଇଁ ତିରକମ୍ ଇସ୍‌ପରନେ ଲିବିସ ଲାବ୍ ତିଙ୍ଗବକେ ଆତେନ୍ ଆପେକେ ଆମ୍ୟାନ୍‌ସା ଇକଟା ତିଙ୍ଗଣିଁକେ । ୨ ମେଇଁ ମ୍ଲା କସ୍ ରକମ୍ ପରିକ୍ୟା ତିଙ୍ଗଆକେ ବାରି ମେଇଁ ଜାବର୍ ଗରିବ୍ ତିଙ୍ଗଲା ତିଗ୍ ଜାବର୍ ସାଦା ବାବରେ ଗୁଲୁଏ ଦାନ୍ ତିଙ୍ଗବଆରକେ । ୩ ନେଙ୍ଗ୍ ସଡ଼ ବାବରେ ବାସଙ୍ଗଣିଁ ଜେ ମେଁଇଁନେ ବପୁ ରକମ୍ ମେଇଁ ଇକଟାରେ ନିଜର୍ ବପୁନେ ଅନୁସାରେ ଦେକରକମ୍ କି ଜାବର୍ ବାବରେ ମେଇଁ ଦାନ୍ ତିଙ୍ଗଆକେ । ୪ ଜିଉଦାନ୍ନିଆ ଲେଃକେ ଇସ୍‌ପରନେ ରେମୁଆଁଇଁକେ ସାଇଜ ତିଙ୍ଗନେସା ଆମେଇଁକେ ସୁଜଗ୍ ବିଃପା ଡାଗ୍‌ତେ ମେଇଁ ଆନେକେ କୁସାମୁତି ତିଙ୍ଗବଆରକେ । ୫ ମେଇଁନେବାନ୍ ନେନେ ଅଃକେନ୍ ଆସା ତିଙ୍ଗନେ ବକେ । ସେନୁଗ୍ ମେଇଁ ନିଜେ ନିଜେକେ ମାପୁନେ ଡାଗ୍ରା ଦାନ୍ ତିଙ୍ଗବଆରକେ ବାରି ଇଡ଼ିଙ୍ଗ ଇସ୍‌ପରନେ ଇକଟା ଅନୁସାରେ ନିଜେ ନିଜେକେ ନେଁଇଁନେ ବିସୟରେ ଦାନ୍ ତିଙ୍ଗଆକେ । ୬ ତିତସ୍‌ନେ ସାଇଜନ୍ନିଆ ଏନ୍ କାମ୍ ଆରାମ୍ ତିଙ୍ଗଲେକେ । ଏନ୍‌କେ ଚାଲେ ଲେଃନ୍‌ସା ବାରି ଏନ୍ ଆଲାଦ୍‌ନେ ଜତନ୍ ସ୍ପେନିଆ ଆପେକେ ସାଇଜ ତିଙ୍ଗ୍ ନ୍‌ସା ତିତସ୍‌କେ କୁସାମୁତି ତିଙ୍ଗନେବକେ । ୭ ପେଇଁ ସାପା ବିସୟନ୍ନିଆ ସାକାର୍ ତିଙ୍ଗପେଲେକେ ବିସ୍‌ବାସ୍ ସାମୁଆଁ ବାସଙ୍ଗନେ ରେମୁଆଁ ବାରି ପେଇଁନେ ଆଡ଼ାତ୍ରା ନେଁଇଁନେ ଆଲାଦ୍ ଅଦିକାର୍ ଦେକରକମ୍ ସାପା ବିସୟ୍ ତିରକମ୍ ପେଇଁନେ ଡାଗ୍ରା ଜାବର୍ ବାବରେ ନ୍‌ଡ଼ିଁକେ ଦେଡ଼ରକମ୍ ଏନ୍ ଲିବିସ କାମ୍ ତିଗ୍ ପେଇଁନେ ଡାଗ୍ରା ଜାବର୍ ବାବରେ ନ୍‌ଲେ ।

୮ ନେଇ ଆଦେସ୍ ବିଷକେ ରକମ୍ ବାସଇ ନାଡ଼ିଇକେ ଶୁ । ମାତରୁ ସେବା ସ୍ନେହ ଆ ବିନ୍ଦୁଶ୍ରେଇଁନେ ଇକ୍ରାନ୍ତେ ଉପଦେସ୍ ବିଚେ ପେନେ ଆଲାଦ୍‌ନେ ସତ୍ ମ୍ୟାନ୍‌ସା ନେଇଁ ରେସ୍‌ଟା ଡ଼ିଇଁଣ୍ଟିକେ । ୯ ପେଇଁ ମାପୁ ଜିସୁ କିସ୍‌ଟନେ ଲିବିସ ବିସୟରେ ମ୍ୟାପେଲେକେ । ମୈଁ ସାଉକାର୍ ଡ଼ିଇଁଟେ ଡ଼ିଗ୍ ପେଇଁନେ ସା ଗରିବ୍ ଡ଼ିଇଁକେ । ମୈଁନେ ଗରିବ୍ ବାନ୍ ପେଇଁ ସାଉକାର୍ ଡ଼ିଇଁପା ।

୧୦ ଏନ୍ ବିସୟରେ ଆପେକେ ନେଇଁନେ ଏନ୍ ଆଦେସ୍ ଷ୍ଟେକ୍ଲେ ମୁଆଁ ପେଇଁ ମୋଃମୋଃନେ ଆରାମ୍ ଡ଼ିଇଁପେବକେ ଆଡେନ୍ ଏକ୍ଲେ ଆଡାନେ ପେଇଁନେ ଦରକାର୍ । ମାତରୁ କାମ୍ ଡ଼ିଇଁନେ ଶୁ ମାତରୁ କାମ୍ ଡ଼ିଇଁନେ ଇକ୍ରା ଡ଼ିଇଁଟେ ଡ଼ିଇଁନେ ପେଇଁ ଡ଼ିଇଁପେଡ଼ିଇଁକେ ସେନ୍‌ଗ୍ । ୧୧ ଆଣ୍ଟିନେ କାମ୍‌କେ ପେଇଁ ଆରାମ୍ ଡ଼ିଇଁ ପେବକେ ଆମେକେ ଆଃଡାପା । ତେଲା ପେଇଁନେ କାମ୍ ଡ଼ିଇଁନେ ବାରି ପେଇଁନେ ଇକ୍ରା ଡ଼ିଇଁନେ ଏଡେ ସମାନ୍ ଡ଼ିଇଁଏ । ପେଇଁ ଡାଗ୍ରା ମୋଃମୋଃନେ ଲୋଃକେ ଆଡ୍‌ବାନ୍ ଦାନ୍ ଡ଼ିଇଁପା । ୧୨ ଜଡ଼ି ପେଇଁନେ ଦାନ୍ ବିଃନେ ଇକ୍ରା ଲୋଃକେ ତେଲା ପେଇଁନେ ଦାନ୍ ଗୁଅନ୍ ଡ଼ିଇଁଏ । ପେଇଁନେ ଡାଗ୍ରା ମୈଁନେ ଲୋଃକେ ଆଡେନ୍ ଅନୁସାରେ ପେଇଁନେ ଦାନ୍ ଗୁଅନ୍ ଡ଼ିଇଁଆରଏ; ପେଇଁନେ ଡାଗ୍ରା ମୋଃମୋଃନେ ଶୁ ଆଡେନ୍ ରକମ୍ ଶୁ ।

୧୩ ପେଇଁନେ ଆଡାଡା ଏନ୍ ଲିଗିଇଁକେ ଆନିଗ୍‌ବିଚେ ବିନ୍ଦୁଶ୍ରେକେ ଆମ୍ଲେଡ଼ିଆ ନ୍‌ସା ନେଇଁ ଚାଏଁନାଡ଼ିଇଁକେ ଶୁ ।

୧୪ ମାତରୁ ଏବେ ପେଇଁନେ ଜାବର୍ ଲୋଃଲା ଅବାବ୍‌ନିଆ ଲୋଃକ୍ଲେ ରେମୁଆଁକେ ସାଇଜ ଡ଼ିଇଁନେ ପେଇଁନେ କାମ୍ । ବେଲା ପାଇଏ ପେଇଁ ଅବାବ୍‌ନିଆ ଲୋଃକାଲା ମୈଁକ୍‌ନେ ଜାବର୍ ଡ଼ିଇଁଲା ପେଇଁନେ ଅବାବ୍ ବଡ଼ ଆଡ଼ିଇଁ ନ୍‌ସା ସାଇଜ ଡ଼ିଇଁଏ । ଦେକ୍‌ରକମ୍ ବାବ୍‌ରେ ପେଇଁନେ ବିଡ୍ରେ ସମାନ୍ ରକ୍ୟା ଡ଼ିଇଁ ପେୟାଏ । ୧୫ ଦର୍ମ ସାସ୍ତ୍ରନ୍‌ନିଆ ଗୁଆର୍ ବକେ; “ଜାଣ୍ଟେ ଜାବର୍ ରାଃସିଇଁକେ ମୈଁନେ ମୋଃଡ଼ିଗ୍ ଆଲୁଆଁକେ ଶୁ । ଜାଣ୍ଟେ ଇକୁଡ଼ା ରାଃସିଇଁକେ ମୈଁନେ ଅବାବ୍ ଆଡ଼ିଇଁ ଶୁ ।”

ତିତସ୍ ବାରି ମୈଁନେ ରେମୁଆଁଶ୍ରେଇଁ

୧୭ ଇସ୍ତଫରନେ ଦନ୍ୟବାଦ୍ ତିଞ୍ଜଲେଃ । ତାଗ୍ଲା ନେଁଇଂନେ ରକମ୍  
 ତିତସ୍ ତିଗ୍ ଆପେକେ ସାଇଜ ତିଞ୍ଜ ନସା ଇକ୍ତା ଲେଃକେ ।  
 ୧୭ ମେଁ ମାତର୍ ନେନେ ଗୁଆରିକେ ଗୁଅନ୍ ତିଞ୍ଜକେ, ଆତେନ୍  
 ଶୁ ମାତର୍ ଆପେକେ ସାଇଜ ତିଞ୍ଜ ନସା ଅଃକେନ୍ ଇକ୍ତା ତିଞ୍ଜ  
 ଲେଃକେ ଜେ ନିଜର୍ ଇକ୍ତାନ୍ନିଆ ପେଇଂନେ ତାଗ୍ଲା ଝେ ନସା  
 ମେଁ ମନ୍ ତିଞ୍ଜବକେ । ୧୮ ମେଁନେ ଏତେ ବାରି ମୁଇଂଜା ବୟାକେ  
 ନେନେ ବେନେବକେ । ନିମାଣ୍ଡା ବ୍ଲାଲିର୍ ବାସଙ୍ ଅଲେଙ୍ଗନେ  
 ସାପା ମଣ୍ଡଲିନ୍ନିଆ ବେପ୍ରେ ଝେଲେଃକେ । ୧୯ ମାତର୍ ଅଃତେନ୍ ଶୁ  
 ମାପୁନେ ମଇମା ବାରି ନେଁଇଂନେ ସେବାବାନ୍ ସାରଲନେ ଇକ୍ତା  
 ତିଞ୍ଜ ନସା ମୁଡିନେ ରାଃସିଙ୍ଗ୍ ଦାନ୍ ତୁଙ୍ଗ୍ଝେନେ କାମ୍ ନେନେ  
 ଗୁଅନ୍ ତିଞ୍ଜନେଡିଂକେ, ଆଡୁଅରିଆ ନେନେ ଏତେ ମିସୁଝେନେ ନସା  
 ବିନ୍‌ବିନ୍ ମଣ୍ଡଲି ଆମେକେ ସ୍ତ୍ରୀ ବକେ ।

୨୦ ଉଦାର୍ ବାବ୍ରେ ବିଃବକ୍ଲେ ଏନ୍ ସେବା ରକମ୍ ଜାବର୍ ଦାନ୍‌କେ  
 ତରକ୍ ଏଃତେ ନେ ବାଃଲିର୍‌ବାଃତା ତିଞ୍ଜନେଡିଂକେ, ତିରକମ୍ ନେନେ  
 ଆଡାତ୍ରା ଜାଣ୍ଡେ ଦସ୍ ତିଞ୍ଜ ଆୟା ଶୁ । ୨୧ ତାଗ୍ଲା ମାତର୍ ମାପୁନେ  
 ସାମ୍ନାନ୍ନିଆ ଶୁ । ମାତର୍ ରେମୁଆଁ ସାମ୍ନାନ୍ନିଆ ତିଗ୍ ସଡ୍ ଲେଃନେ  
 ନେନେ ଇକ୍ତା ।

୨୨ ତେସା ମେଁଇଂନେ ଏତେ ଏନ୍ ବୟାକେ ନେନେ ବେନେବକେ  
 । ଆମେକେ ଜାବର୍ ତର୍ ପରିକ୍ୟା ତିଞ୍ଜତେ ମେଁନେ ବିସ୍‌ବାସ୍‌ନେ  
 ପରିଚୟ୍ ବାନେଲେଃକେ । ପେଇଂନେ ଆଡାତ୍ରା ମେଁନେ ତାବ୍  
 ବିସ୍‌ବାସ୍ ଲେଃଲା ମେଁ ଆପେକେ ସାଇଜ ତିଞ୍ଜ ନସା ଜାବର୍ ଇକ୍ତା  
 ତିଞ୍ଜଲେକେ । ୨୩ ତିତସ୍‌ନେ ବିସୟ୍‌ରେ ଏନ୍ ମ୍ବାସଙ୍‌ଏ ଜେ, ମେଁ  
 ନେଙ୍ଗ୍ ଏତେ କୁଡେତେ ସ୍ଲେରେ । ବାରି ମେଁ ନେଙ୍ଗ୍ ଏତେ କାମ୍  
 ତିଞ୍ଜତେ ଆପେକେ ସାଇଜ ତିଞ୍ଜକେ । ବିନ୍ ବୟାଈଂନେ ବିସୟ୍‌ରେ  
 ଏନ୍ ବାସଙ୍‌ଏ ଜେ ମେଇଂ ବିନ୍‌ବିନ୍ ମଣ୍ଡଲିଈଂବାନ୍ ବେବଆରକେ  
 ବାରି କିସ୍‌ଟନେ ନସା ମଇମା ରକମ୍ । ୨୪ ଏଲେଡିଗ୍ ଆମେଇଂକେ  
 ପେଇଂନେ ଆଲାଦ୍ ଆଃସୁଏପା । ତେଲା ସାପା ମଣ୍ଡଲି ଏନ୍ ବିସୟ୍‌ରେ  
 ସଡ୍ ମାନେଆରଏ ବାରି ପେଇଂ ନସା ନେନେ ତିଞ୍ଜମ୍ୟାକ୍ଲେ ଗରବ୍  
 ଜାବର୍ ତାଗ୍‌ତେ ପାର୍‌ମାନ୍ ତିଞ୍ଜ ଯାଆରଏ ।



ବିନ୍ ମଣ୍ଡଳିନେ କ୍ରିଷ୍ଟିଆନ୍‌ଇଂ ନ୍‌ସା ସାଇଜ

୧ ଜିଉଦାନ୍ନିଆ ଲେଖକ୍ତେ ଇସ୍‌ପରନେ ରେମୁଆଁଇଂନେ ଡାଗ୍ରା ସାଇଜ ବେନ୍‌ସା ଆପେକେ ଗୁଆରନେ ମେଃଡିଗ୍ ଦରକାର୍ ଶୁ । ୨ ନେଙ୍ଗ୍ ମ୍ୟାଲ୍‌କେ ପେଇଂ ସାପାବେଲା ସାଇଜ ଡିଙ୍ଗ୍‌ନ୍‌ସା ତିଆର୍ ପେଲେକେ । ବାରି ମାସିଦୋନିଆନେ ରେମୁଆଁଇଂନେ ଡାଗ୍ରା ପେଇଂନେ କୁଡେଃମାଡେଃନିଆ ନେଙ୍ଗ୍ ଗରବ୍ ଡିଙ୍ଗ୍‌ଣିଂକେ । ନେଙ୍ଗ୍ ବାସଙ୍ଗ୍‌ମ୍‌କେ “ଆଖାୟାନେ ବୟାଁଇଂ ସାଇଜ ଡିଙ୍ଗ୍ ନ୍‌ସା ଝେକ୍ତେ ମୁଆଃବାନ୍ ତିଆର୍ ଡିଙ୍ଗ୍ ଲେଃଆରକେ ।” ପେଇଂନେ ତିଆର୍ ମେଁଇଂନେ ବିଡ୍ରେ ଉଃଡିରୁଆକେ ତରକ୍ ଆଡିଙ୍ଗ୍‌ବକେ । ୩ ଏବେ ନେଙ୍ଗ୍ ଏନ୍ ବୟାଁଇଂକେ ପେଇଂନେ ଡାଗ୍ରା ବେଣ୍ଟିଂ । କେଲାପା ଏନ୍ ବେଲା ତିରକମ୍ ପେଇଂନେ ସମ୍‌କିନ୍ନିଆ ନେନେ ବଡ୍‌ପନ୍ ବେକାର୍ ଆଡିଙ୍ଗ୍ ଶୁ । ନେଙ୍ଗ୍ ବାସଙ୍ଗ୍‌ନେ ରକମ୍ ପେଇଂ ଦାନ୍ ଏଡେ ତିଆର୍ ଡିଙ୍ଗ୍ ଲାଲାପା । ୪ ମାସିଦୋନିଆନେ ରେମୁଆଁଇଂ ନେଙ୍ଗ୍ ସଙ୍ଗେ ଝେଚେ ଜଦି ଆପେକେ ତିଆର୍ ଆଡିଙ୍ଗ୍‌ନେ କେଆରଏ; ତେଲା ପେଇଂନେ ଆଡାଡା ଡାଟ୍ ବିସ୍‌ବାସ୍ ଲେଃକେ ସା ନେନେ ଗିଆସ ନେଡିଙ୍ଗ୍‌ଏ ସଡ୍‌ରେ ବାସଙ୍ଗ୍ ଝେଲା ଆଡେନ୍ ପେଇଂନେ ଆଡାଡା ଡିଗ୍ ଗିଆସମାଲା ଡିଙ୍ଗ୍‌ଏ । ୫ ପେ ଅଃସେ ପାରମାନ୍ ଡିଙ୍ଗ୍‌କ୍ତେ ଦାନ୍ ରାସିଙ୍ଗ୍ ଡିଙ୍ଗ୍‌ନେ ସା ଏନ୍ ବୟାଁଇଂକେ ନେଙ୍ଗ୍ ଝେନେ ସେନୁଗ୍ ପେଇଂନେ ଡାଗ୍ରା ଝେ ନ୍‌ସା ମ୍‌ସାସଙ୍ଗ୍‌ଏ । ତେଲା ନେଙ୍ଗ୍ ପେଇଂନେ ଡାଗ୍ରା ଝେଚାନେ ବେଲା ଏନ୍ ଦାନ୍ ରାସିଙ୍ଗ୍‌ଚେ ବଆରଏ । ଏନ୍ ବାନ୍ ପେଇଂ ଜବଡ୍‌ଜସ୍ତି ବାବ୍‌ରେ ମାବିଚେ ନିଜର୍ ଇକ୍‌ଚା ଡିଙ୍ଗ୍‌ଚେ ବିପେଡିଙ୍ଗ୍‌କେ ଡାଗ୍‌ଚେ ନ୍‌ଲେ ।

୬ ମନେ ବପା ମୁଡି ରେମୁଆଁ ଇକୁଡା ବୁ ବିଗ୍‌ଏ ମେଁ ଇକୁଡା ଝେଏ; ଜାଣ୍ଟେ ରେମୁଆଁ ଜାବର୍ ବୁ ବିଗ୍‌ଏ ମେଁ ମାଲେ ଝେଏ । ୭ ସାପା ରେମୁଆଁ ନିଜର୍ ମନ୍‌ନିଆ ମେଃମେଃନେ ବାବେ ବଆରକେ, ଆଡେନ୍ ରକମ୍ ଦାନ୍ ଡିଙ୍ଗ୍ ଆରଲେ ମନ୍‌ନିଆ ମେଃଡିଗ୍ ଦୁକ୍ ବଚେ ଜବଡ୍‌ଜସ୍ତି ବାବ୍‌ରେ ଦାନ୍ ଆଡିଙ୍ଗ୍‌ଲେଃ ସାଦା ମନ୍‌ନିଆ ଦାନ୍ ଡିଙ୍ଗ୍‌ବକ୍ତେ ରେମୁଆଁକେ ପର୍‌ମେସର୍ ବଲ୍ ବାଏ । ୮ ସାପା ରକମ୍ ଦାନ୍‌ନିଆ ଆପେକେ ମ୍‌ସା ଡିଙ୍ଗ୍ ନ୍‌ସା ଇସ୍‌ପର ଇକ୍‌ଚା; ଇଡିଙ୍ଗ୍ ପେଇଂ

କାଳାଆଃ ଜାବରନେ ବିତ୍ତେ ବାସା ପେୟାଏ ବାରି ସାପା ରକମ୍  
ସତ୍ତକାମ୍ ନସା ଜାବର ଦାନ ବିପେୟାଏ ।<sup>୯</sup> ଦର୍ମ ସାସ୍ତ୍ରନ୍ନିଆ ଗୁଆର୍  
ବକେ,

“ଆଲୋଃକ୍ଷେ ରେମୁଆଁଇଂକେ ମୁକ୍ତି ବାବ୍ରେ

ଦାନ ଡିଙ୍ଗ୍‌ଏ; ମୈନେ ଲିବିସଃ କାଳାଆଃ ଲେଃଏ ।”

<sup>୧୦</sup> ପରମେସର୍ ବିଗ୍‌ଜା ରେମୁଆଁ ନସା ରୁ ବାରି ଚଙ୍ଗନେ ସା ବଲେ  
ଆର୍ମେବିଏ ପରମେସର୍ ବିଗ୍ ନସା ଆପେକେ ରୁଜା ଆର୍ମେବିଏ ବାରି  
ଆତେନ୍ ଆମ୍ମାଏ ବାରି ପେଇଂନେ ନିମାଣ୍ଡା ବିସୟରେ ଆମ୍ମା ବିଏ;  
<sup>୧୧</sup> ଦେକ୍ ରକମ୍ ପେଇଂ ସାପା ବିସୟରେ ସାଉକାର୍ ଡିଙ୍ଗ୍‌ରେ  
ସାପା ରକମ୍ ଦାନ ଡିଙ୍ଗ୍‌ପେୟାଏ ବାରି ଆତେନ୍ ନେଇଂନେ ବାନ୍  
ଇସ୍‌ପରନେ ବାନେ କାରନ୍ ଡିଙ୍ଗ୍‌ଏ । <sup>୧୨</sup> ପେଇଂନେ ଦାନ ରକମ୍  
ସେବା ଜେ ମାତର୍ ଇସ୍‌ପରନେ ରେମୁଆଁଇଂନେ ଅସ୍‌ବିଦା ଆଡିଙ୍ଗ୍  
ଶୁ । ଆତେନ୍ ଶୁ ମାତର୍ ଏନ୍ ବାନ୍ ଇସ୍‌ପରନେ ଆଡାଡା ଗୁଲୁଏ  
ଗାଗ୍‌ଡେନେ ଜାବର ଦନ୍‌ସବାଦ୍ ଲାଡ଼୍ୟା ଝେଏ । <sup>୧୩</sup> ଏନ୍ ଜତନ୍ କାମ୍  
ବାନ୍ କିସ୍‌ଟନେ ନିମାଣ୍ଡା ସାମୁଆଁ ଆଡାଡା ପେଇଂନେ ବିସବାସ୍ ନସା  
ବାରି ସାପାରେନେ ଏତେ କୁଡେରେ ପେଇଂ ମୁଡିନେ ଦାନ ଆନ୍  
ପେବକେ ଆତେନ୍‌ସା ମେଇଂ ଇସ୍‌ପରନେ ମଇମା ଆନ୍ ଆର୍‌ଏ ।  
<sup>୧୪</sup> ପେଇଂନେ ଆଡାଡା ଇସ୍‌ପରନେ ମାଲେ ଲିବିସ ନସା ମେଇଂ  
ଗୁଲୁଏ ସାଦା ଏତେ ପାର୍‌ତନାନ୍ନିଆ ଆପେକେ ମନେ ଡିଙ୍ଗ୍‌ଆର୍‌ଏ ।  
<sup>୧୫</sup> ପାଙ୍ଗ୍‌ଲାପା ଇସ୍‌ପରନେ ଇରିଆଡୁଗ୍ ବାରି ବାସଙ୍ଗ୍ ମାୟାନେ ଦାନ  
ନସା ମୈନେ ଆଡାଡା ଦନ୍‌ସବାଦ୍ ନେବାସଙ୍ଗ୍‌ପା ।

## ୧୦

ଦଦ୍ୟା ବାସଙ୍ଗ୍‌ନେ ବିରଦ୍‌ରେ ପାଉଲ୍‌ନେ ଉତ୍ତର୍

<sup>୧</sup> ନେଙ୍ଗ୍ ପାଉଲ୍ ଆପେକେ ନେଙ୍ଗ୍‌ନେ ଏନ୍ ନିଜ୍‌ରନେ ନମସ୍ତାର୍  
। ଜାଣ୍ଡେ ଜାଣ୍ଡେ ବାସଙ୍ଗ୍‌ଏ, “ନେଙ୍ଗ୍ ପେଇଂନେ ଡାଗ୍‌ଲା ଲେଃବେଲା  
ମାଲେ ଦରମ୍ ବାରି ସାଡି ଲେଃଏ ମାତର୍ ସୁ ଝେଲା ମାଲେ ସାହାସ୍  
ଲେଃଏ ।” କିସ୍‌ଟନେ ଦରମ୍ ବାରି ମ୍ପେ ବାରି ଦରମ୍ ବାବ୍ରେ  
ମନେ ଆଃଏତେରେ ଆପେକେ କୁସାମୁତି ଶ୍ରିଙ୍ଗ୍‌ଏ;<sup>୨</sup> ପେଇଂନେ ଏତେ  
କୁଡେଃ ବେଲା ଆନେଙ୍ଗ୍ ଡିରକମ୍ ସାହାସ୍ ରକମ୍ ବାଃଲିର୍‌ବାଃତା  
ଡିଙ୍ଗ୍‌ନେସା ଆପଡେ ଶୁ । ଡାଗ୍‌ଲା ଜାଣ୍ଡେଇଂ ମନେ ଡିଙ୍ଗ୍‌ଏ ଜେ

ନେନେ ଗାଗଡ଼େନେ ନିଡିନିୟମ୍ ରକମ୍ ଚାଲେନେଡିଂକେ ମେଁଇଂନେ ବିରଦ୍ରେ ତାଟ୍ ବାଦୁଲ୍ ତୁଙ୍ଗ୍‌ଝେନେ ଜାବର୍ ସାହାସ୍ ନେଙ୍ଗ୍‌ନେ ଲେଃକେ । ୩ ତାଗ୍ଲା ନେ ମଞ୍ଚପୁର୍ନୁଆ ବାସା ନେଲେଏ ସଡ୍, ମାତର୍ ନେ ସଂସାର୍‌ନୁଆ ଏତେ ବାସା ନେଡିଙ୍ଗ୍ ଶୁ । ୪ ତେସା ନେ ସଂସାର୍‌ନେ ସାଜବାଜ ଗାଗଡ଼େ ଶୁ ସତୁଇଂନେ ତାଟ୍ ଗାଲିସାପା ଦଂସ ଡିଙ୍ଗ୍‌ନେ ସା ଇସ୍‌ପର୍‌ନେ ଆତେନ୍ ବପୁ ବାନ୍ ଦଂସ ଆଡିଙ୍ଗ୍ ନେବିଏ । ୫ ଇସ୍‌ପର୍‌ନେ ଗ୍ୟାନ୍‌କେ ବିରଦ୍ ଡିଙ୍ଗ୍‌ମ୍ୟାକ୍‌କେ ସାପା ହେ ସାମୁଆଁ ଦଂସ ଡିଙ୍ଗ୍‌ଲେ । ବାରି ରେମୁଆଁନେ ସାପା ଚିନ୍ତାକେ କିସ୍‌ଟନେ ଆଦେସ୍ ମାନେଃଲେ । ୬ ଆଣ୍ଡିନେ ରେମୁଆଁ ସମାନ୍ ବାବ୍‌ରେ କ୍ରିସ୍‌ଟେ ଅମାନି ଡିଙ୍ଗ୍‌ଏ ନେନେ ଆମେକେ ଡଣ୍ଡୁ ବିନ୍‌ସା ତିଆର୍ ନେଲେକେ । ମାତର୍ ସେନୁଗ୍ ନେନେ ଇକ୍‌ଚା ନେଡିଙ୍ଗ୍‌ଏ ଜେ ପେଇଂ ମେଁନେ ଆଦେସ୍ ମାନେପା ।

୭ ପେନେ ପିତୁର୍‌ପାକା ମେଃମେଃନେ ସାପା ଗଟେଡିଂକେ କେଲାପା । ପେଇଂନେ ବିତ୍ରେ ଜାଣ୍ଡେ କିସ୍‌ଟନେ ବିସ୍‌ବାସି ଲେଃଆର୍‌କେ ଲେଃ ? ଜଦି ଲେଃଆର୍‌କେ ତେଲା ମେଁ ଆର୍‌ମୁଇଂତର୍ ଏନ୍ ଚିନ୍ତା ଡିଙ୍ଗ୍ କେଲାପା । ତାଗ୍ଲା ମେଁନେ ରକମ୍ ନେନେ ଡିଗ୍ କିସ୍‌ଟନେ ବିସ୍‌ବାସି । ୮ ଆପେକେ ଦଂସ ଆଡିଙ୍ଗ୍ ନ୍‌ସା ଶୁ ମାତର୍ ଆରେ ନ୍‌ସା ଇସ୍‌ପର୍ ଆନେକେ ମୁଡିନେ ଅଦିକାର୍ ବିବକେ, ଆତେନ୍ ସା ଜଦି ନେଙ୍ଗ୍ ମାଲେ ଗରବ୍ ଶ୍ରିଙ୍ଗ୍‌ଏ, ତେଲା ଗିଆସ ନାଡିଙ୍ଗ୍ ଶୁ । ୯ ନେଙ୍ଗ୍ ନେଙ୍ଗ୍‌ନେ ଚିଟି ବାନ୍ ଆପେକେ ବାଃଟନ୍‌ସା ଚେସ୍‌ଟା ଡିଙ୍ଗ୍‌ଶ୍ରିଂକେ ତାଗ୍‌ଚେ ପେଇଂ ଆଏତେଗେପା । ୧୦ ଜାଣ୍ଡେ ଜାଣ୍ଡେ ବାସଙ୍ଗ୍‌ଆର୍‌ଏ “ପାଉଲ୍‌ନେ ଚିଟିଇଂ ବାଦେକେ ରକମ୍ ବାରି ଗୁଆକେ ରକମ୍ ମାତର୍ ନେ ଏତେ ଲେଃକେଲା ମେଁନେ ଗାଗଡ଼େ ରୁଗଟ୍ୟା ନାମ୍ୟାକେ ବାରି ମେଁନେ ସାମୁଆଁ ଦଦ୍ୟା ରକମ୍ ଲାଗେଏ ।” ୧୧ ଆତେନ୍ ରେମୁଆଁଇଂନେ ବୁଜେନେ ଦର୍‌କାର୍ ଜେ ନେନେ ସ୍ଲୁ ବାନ୍ ଚିଟିନୁଆ ମେଃମେଃନେ ନେଗୁଆର୍‌ଏ ସାମ୍‌ନାନ୍ନିଆ ଆମେକେ ସ୍ଲେନିଆ ବେବଆର୍ ନେଡିଙ୍ଗ୍‌ଏ ।

୧୨ ତାଗ୍ଲା ଜାଣ୍ଡେଇଂ ଆମ୍ବା ପ୍ରସଂସା ଡିଙ୍ଗ୍‌ଆର୍‌ଏ ମେଁଇଂନେ ବାନ୍ ଜାଣ୍ଡେ ଜାଣ୍ଡେ ଏତେ ନିଜେ ନିଜେକେ ତୁଲ୍‌ନା ଡିଙ୍ଗ୍‌ନେସା ନେ ସାହାସ୍ ନେଡିଙ୍ଗ୍‌କେ ଶୁ: ମାତର୍ ମେଇଂ ନିଜେ ନିଜେ ନିଜର୍ ନିଜର୍‌ବାନ୍

ନିଜର ନିଜରନେ ଇସାବ୍ ବାରି ନିଜର ନିଜର ଏତେ ନିଜର ନିଜରନେ ରକମ୍ ତିଜ୍ଠାଚେ ମୁକ୍ ଆନା ବକେ ।<sup>୧୩</sup> ଆନେକେ ମୁଡ଼ିନେ କାମ୍ ବିବ ଆରକେ ଆଡ଼ବାନ୍ ସିମା ଗାଲେଗ୍ରେ ଅଃନାଡ଼ିଗ୍ ଗରବ୍‌ନେ ସାମୁଆଁ ନେବାସଜ୍ ଶୁ । ପରମେସର୍‌ନେ ବିଃକ୍ଲେ କାମ୍ ନ୍ୟା ନେନେ ନିଜେ ଗରବ୍ ନେଡ଼ିଜ୍ଠାଏ । ଏନ୍ କାମ୍ ପେଇଂନେ ଏତେ ନେନେ କାମ୍‌କେ ଡିଗ୍ ପାକାପାକି ତିଜ୍ଠାଏ ।<sup>୧୪</sup> ଆତେନ୍‌ସା ନେନେ ସେନ୍‌ଗ୍ କିସ୍‌ଟନେ ନିମାଣ୍ଡା ସାମୁଆଁ ପେଇଂନେ ଡାଗ୍ରା ତୁଜ୍ଠା ଝେନେ ବେଲା ମେଃଡ଼ିଗ୍ ସିମା ବାଏରେନେ କାମ୍ ନେଡ଼ିଜ୍ଠାକେ ଶୁ ।<sup>୧୫</sup> ନେନେ ବିନ୍‌ଶ୍ଟେ ବାନ୍ ଆଡ଼ିଜ୍ଠାବକ୍ଲେ କାମ୍ ନ୍ୟା ଶୁ ମାତର୍ ନିଜେ ତିଜ୍ଠାବକ୍ଲେ କାମ୍ ନ୍ୟା ଗରବ୍ ତିଂନେଡ଼ିଜ୍ଠାଏ । ନେନେ ଆସା ନେଡ଼ିଜ୍ଠାଏ ଜେ ପେଇଂନେ ବିସ୍‌ବାସ୍ ମ୍ନାନ୍ ଏତେ ନେନେ କାମ୍ ଜାବର୍ ବାବ୍‌ରେ ମ୍ନାନ୍ ପେଇଂ ସାଇଜ ପେଡ଼ିଜ୍ଠାଏ ।<sup>୧୬</sup> ତେଲା ବିନ୍‌ଶ୍ଟେ ତିଜ୍ଠାବକ୍ଲେ କାମ୍ ଆଡ଼ାଡ଼ା ଗରବ୍ ମାଡ଼ିଜ୍ଠାଚେ ପେଇଂନେ ଗିରା ବାଏରେ ବିନ୍ ଦେସ୍‌ନ୍ନିଆ ଡିଗ୍ ନେନେ ନିମାଣ୍ଡା ସାମୁଆଁ ବାସଜ୍ ନେୟାଏ ।

<sup>୧୭</sup> ଦର୍ମ ସାସ୍‌ରନ୍ନିଆ ଗ୍ଲୁଆରଲେଃକେ “ଜାଣ୍ଡେ ଗରବ୍ ତିଜ୍ଠାଚେ ଚାଏଁଏ ମେଁ ମାପୁନେ କାମ୍ ନ୍ୟା ଗରବ୍ ତିଜ୍ଠାଲେ ।”<sup>୧୮</sup> ଡାଗ୍ଲା ଜାଣ୍ଡେ ନିଜର୍ ପ୍ରସଂସା ତିଜ୍ଠାଏ, ମେଁ ପରିକ୍ୟା ନିମାଣ୍ଡା ଶୁ ମାତର୍ ମାପୁ ଜାଣ୍ଡେନେ ପ୍ରସଂସା ତିଜ୍ଠାଏ, ମେଁନେ ପରିକ୍ୟା ନିମାଣ୍ଡା ।

## ୧୧

### ପାଉଲ୍ ବାରି ମିରୁଆ ସିସ୍

<sup>୧</sup> ନେଜ୍ ଚାଏଁଶ୍ଟିଂକେ ମେଃଡ଼ିଗ୍ ବିସ୍‌ୟନ୍ନିଆ ଇଡୁଡା ମୁକ୍ ତିଜ୍ଠାଲା ଡିଗ୍ ପେଇଂ ଆନେଜ୍ ସମ୍ମାଲେ ପେଡ଼ିଜ୍ଠାଏ ।<sup>୨</sup> ପେଇଂନେ ବିସ୍‌ୟନ୍ନିଆ ମୁଇଜ୍ ଦରମ୍ ଇସା ମନ୍ ନେଜ୍ ମନ୍‌ନ୍ନିଆ ଲେଃକେ । ଡାଗ୍ଲା ପେଇଂ ପବିତ୍ର ସେଲା ରକମ୍ । ମୁଇଂ ଆଃ ଜିରେ କିସ୍‌ଟନେ ଏତେ ଆପେକେ ଆମିସୁ ବିଃନ୍‌ସା ନେଜ୍ ପାର୍‌ମାନ୍ ତିଜ୍ଠାମୁକେ ।<sup>୩</sup> ମାତର୍ ବୁବଃ ନିଜର୍ ଚାଲାକିନ୍ନିଆ ହବାକେ ଡିରକମ୍ ଆଃବାୟାକେ ଦେଡ଼ରକମ୍ ଅଃନା ପେଇଂନେ ମନ୍ କିସ୍‌ଟନେ ଆଡ଼ାଡ଼ା ଦରମ୍ ବାରି ପବିତ୍ରତାବାନ୍ ନସୁ ତିଜ୍ଠାଏ ନେଜ୍‌ନେ ଏନ୍ ବୁଟମେଗ୍ ତିଜ୍ଠାକେ ।<sup>୪</sup> ଡାଗ୍ଲା ଜାଣ୍ଡେ ଜଦି ପାଜ୍‌ଚେ ନେନେ ବାସଜ୍ ମ୍ୟାକ୍ଲେ ଜିସୁକେ ଆଃଡାର୍‌ଚେ ବିନ୍

ଆଣ୍ଡିନେ ଜିସୁନେ ସାମୁଆଁ ବାସଙ୍ଗ୍ ଆରଏ ଶୁଲା ପେଇଂ ବାକ୍ସେ ପବିତ୍ର ଆମ୍ବାକେ ଆଃତାରତେ ବିନ୍ ଆଣ୍ଡିନେ ପବିତ୍ର ଆମ୍ବାନେ ସାମୁଆଁ ବାସଙ୍ଗଏ ଶୁଲା ପେଇଂ ଗ୍ରଅନ୍ ତିଙ୍ଗ୍ଲେ ନିମାଣ୍ଡା ସାମୁଆଁ ଆଃତାରତେ ବିନ୍ ଆଣ୍ଡିନେ ନିମାଣ୍ଡା ସାମୁଆଁ ବାସଙ୍ଗଏ ପେଇଂ ସାହାସ୍ ସାତେ ମୈଇଂନେ ବାନ୍ ଅପେଡିଂକେ ।

୫ ପେଇଂନେ ଆତେନ୍ “ମ୍ବା ପ୍ରେରିଡ୍” ସିସ୍ଲଂନେ ବାନ୍ ନେଙ୍ଗ୍ ମେଃଡିଗ୍ ଗୁନ୍ନିଆ ତାଆଁ ତିଙ୍ଗ୍ରେ ବାବେ ନାଡିଙ୍ଗ୍କେ ଶୁ । ୬ ନେଙ୍ଗ୍ ମୈଇଂନେ ରକମ୍ ଅସିକିଡ୍ ବକ୍ତା ଶୁ ମାତର୍ ନେଙ୍ଗ୍ନେ ଗ୍ୟାନ୍ ଲେଃକେ । ଆପେକେ ଏନ୍ ସାମୁଆଁ ନେନେ ସାପାବେଲା ବାସଙ୍ଗ୍ ନେପାଙ୍ଗ୍କେ ।

୭ ନେଙ୍ଗ୍ ଆପେକେ ବିନା ମୁଲ୍ୟନ୍ନିଆ ପରମେସରନେ ନିମାଣ୍ଡା ସାମୁଆଁ ବାସଙ୍ଗ୍ ଶ୍ରିଙ୍ଗ୍କେ । ଆପେକେ ମ୍ବା ଆଡିଙ୍ଗ୍ ନ୍ସା ନେଙ୍ଗ୍ ନିଜେକେ ତାଆଁ ଆଡିଙ୍ଗ୍ମୁକେ । ଏନ୍ ମେଃମେଃନେ ନେଙ୍ଗ୍ନେ ବୁଲ୍ ? 「ପେଇଂନେ ବିତ୍ତେ କାମ୍ ତିଙ୍ଗ୍କେଲା ନେଙ୍ଗ୍ ବିନ୍ ମଣ୍ଡଲିଙ୍ଗ୍ନେବାନ୍ ନେଙ୍ଗ୍ ସାପା ସାଇଜ ବାଙ୍ଗ୍ଲେକେ । ବାସଙ୍ଗ୍ନେ ଝେଲା ପେଇଂନେ ବଲ୍ ନ୍ସା ନେଙ୍ଗ୍ ଆମେଇଂକେ ତଙ୍ଗା ମୁକେ । ୮ \*ମାତର୍ ନେଙ୍ଗ୍ ପେଇଂ ବିତ୍ତେ ଲେଃକେଲା ଉଡିବେଲା ଅସବିଦା ତିଙ୍ଗ୍ଲେକେ ଆତେନ୍ ବେଲା ନେଙ୍ଗ୍ ଜାଣ୍ଡେ ରେମୁଆଁନେ ଲିଗିଙ୍ଗ୍ ରକମ୍ ତିଙ୍ଗ୍ ନାନେ ଲେଃକେ ତାଗ୍ଲା ମାସିଦୋନିଆବାନ୍ ବୟାଈଂ ପାଙ୍ଗ୍ରେ ନେଙ୍ଗ୍ନେ ଅବାବ୍ ବତ୍ ଆଡିଙ୍ଗ୍ବକେ ବାରି ମେଃଡିଗ୍ ବିସୟରେ ପେଇଂନେ ଲିଗିଙ୍ଗ୍ ରକମ୍ ଆଡିଙ୍ଗ୍ ନ୍ସା ନିଜର୍ ବିସୟନ୍ନିଆ ତରକ୍ ତିଙ୍ଗ୍ଲେକେ ବାରି ତରକ୍ ତିଙ୍ଗ୍ଲେଏ । ୯ ନେଙ୍ଗ୍ ତାଗ୍ଲା ଲେଃକେ କିସଟନେ ସଡକେ ସାକି ବତେ ନେଙ୍ଗ୍ ବାସଙ୍ଗ୍ଣିଂ ଜେ ଆଖାୟା ଦେସ୍ନେ ମେଃଡିଗ୍ ଅଞ୍ଚଲନ୍ନିଆ ନେଙ୍ଗ୍ନେ ଏନ୍ ଗରବ୍କେ ଜାଣ୍ଡେ ବାଙ୍ଗେ ଆୟା ଶୁ । ୧୦ ନେଙ୍ଗ୍ ମେନ୍ସା ଦେକ୍ରକମ୍ ବାସଙ୍ଗ୍ଣିଂ ? ନେଙ୍ଗ୍ ମେଃନେ ଆପେକେ ଆଲାଦ୍ ତିଂନାଡିଙ୍ଗ୍କେ ଶୁ ? ଇସପର୍ ମ୍ୟାଲେଃକେ ଆପେକେ ନେଙ୍ଗ୍ ଉଡି ଆଲାଦ୍ ତିଂଣ୍ଡିଂକେ ।

୧୧ ନେଙ୍ଗ୍ ମେଃମେଃନେ ମ୍ବାସଙ୍ଗଏ ଆତେନ୍ ତିଙ୍ଗ୍ ଲେଃଏ ତେଲା ନେନେ ରକମ୍ କାମ୍ ତିଙ୍ଗ୍ଆରଡିଂକେ ତାଗ୍ରେ “ବିନ୍ ମ୍ବା ପ୍ରେରିଡ୍”

☆ ୧୧:୯ ୧୧:୯ ପିଲିପିୟ ୪:୧୫-୧୮.



ଗରବ୍ ତିଙ୍କିଆରୁଏ, ମେଇଁ ବାରି ଆତେନ୍ ତିଙ୍କି ଆୟାଆରୁ ଶୁ ।  
 ୧୩ ମେଇଁ ବେକ୍ଲେ ସିସ୍ ଶୁ ମେଇଁ ସାପାରେ ବଣ୍ଡ । ମେଇଁ ନିଜର୍  
 କାମ୍ ବିସୟରେ ମିର୍ ବାସଙ୍ଗିଆରୁଏ ବାରି କିସ୍ତନେ ବେବକ୍ଲେ ସିସ୍  
 ରକମ୍ ଆନାନେ ସା ବିନ୍ ମୁତ୍ ସାଃଆରୁଏ । ୧୪ ଏନ୍ସା ଇରିଆତୁଗ୍  
 ତିଙ୍କିନେ ମେଃଡିଗ୍ ଶୁ ତାଗ୍ଲା ସେଃଆଁରେ ଡିଗ୍ ତାକ୍ ଗ୍ରେ କିତ୍ନେ  
 ଦୁଡ୍ ରକମ୍ ଆସୁଏ ନ୍ସା ବିନ୍ ରୁପ୍ ସାଃଲେଃଏ । ୧୫ ତେସା  
 ମୈନେ ଗତିରେଇଁ ଦରମ୍ନେ ଗୁତିରେନେ ବିନ୍ ମୁତ୍ ସାଃ ଲେଃଲା  
 ଇରିଆତୁଗ୍ ତିଙ୍କିନେ ମେଃଡିଗ୍ ଶୁ ମାତର୍ ଇଡିଙ୍ଗ୍ ମୈଇଁନେ କାମ୍  
 ତିଙ୍କିକ୍ଲେ ତଣ୍ଡ ମେଇଁ ବଗେଆରୁଏ ।

**ବେବକ୍ଲେ ସିସ୍ ରକମ୍ ପାଉଲ୍ ଡଣ୍ଡବାନେ**

୧୬ ନେଙ୍ଗ୍ ଆରମୁଇଁତର୍ ବାସଙ୍ଗିଂ ଜାଣ୍ଡେ ତିରକମ୍ ଆନେଙ୍ଗ୍  
 ମୁର୍କ୍ ତାଗ୍ରେ ମନେ ଆଡିଙ୍ଗ୍ଲେଃ । ଜଦି ଦେଡ୍‌ରକମ୍ ମନେ ତିଙ୍କିଏ  
 ତେଲା ଆନେଙ୍ଗ୍ ମୁର୍କ୍ ବାବ୍ରେ ଗ୍ରଅନ୍ ତିଙ୍କିପା ତେଲା ନେଙ୍ଗ୍  
 ଡିଗ୍ ଇକୁଡା ଗରବ୍ ତିଙ୍କିୟାଏ । ୧୭ ଏବେ ନେଙ୍ଗ୍ ମେଃମେଃନେ  
 ବାସଙ୍ଗିଂ, ଆତେନ୍ସା ମାପୁ ଆନେଙ୍ଗ୍ ଆଦେସ୍ ବିଆବକେ ଶୁ । ତାଗ୍ଲା  
 ସାଆସ୍ରେ ଗରବ୍ ତିଙ୍କିନେ ବିସୟରେ ନେଙ୍ଗ୍ ସତେଆ ମୁର୍କ୍ ରକମ୍  
 ସାମୁଆଁ ବାସଙ୍ଗିଂ । ୧୮ ମାତର୍ ସଂସାରନେ ବିସୟନ୍ନିଆ ଗୁଲୁଏ  
 ରେମୁଆଁ ତିରକମ୍ ଗରବ୍ ତିଙ୍କିଆରୁଏ ନେଙ୍ଗ୍ ଡିଗ୍ ଦେଡ୍‌ରକମ୍  
 ଗରବ୍ ତିଙ୍କି ପାରେ ୧୯ ପେଇଁ ଗ୍ୟାନି ତିଙ୍କିତେ ଡିଗ୍ ସାର୍ଦାରେ  
 ମୁର୍କ୍‌କଲ୍‌କେ ସାମ୍ପାଲେ ପେଡିଙ୍ଗ୍‌କେ । ୨୦ ଜାଣ୍ଡେ ଆପେକେ ଚାକର୍  
 ଆଡିଙ୍ଗ୍‌ତେ ବଏ ପେଇଁନେ ସମ୍ପତି ସାପା ତୁଙ୍ଗ୍‌ଖେଏ ଆପେକେ  
 ପାନ୍‌ନ୍ନିଆ ଲ୍ଲାଗ୍‌ଏ ଆପେକେ ଇଙ୍ଗ୍‌ତେ ଆର୍‌କେ ଦେକ୍‌ରକମ୍ କି  
 ପେନେ ଗିଙ୍ଗିଙ୍ଗିନ୍ନିଆ ମୁଇଁ ଚାପଡ୍ ବଗ୍‌ଲା ଡିଗ୍ ପେଇଁ ଆମେକେ  
 ସମ୍ପାଲେ ଲାଲାପା । ୨୧ ନେଙ୍ଗ୍ ଗିଆସତେ ଗ୍ରଅନ୍ ଶିଙ୍ଗିକେ ଜେ ଏନ୍  
 ସାପା ବିସୟରେ ନେଙ୍ଗ୍ ଜାବର୍ ଅସକ୍‌ତିଆ ।

ମାତର୍ ବିନ୍ ମେଃଡିଗ୍ ବିସୟରେ ଜାଣ୍ଡେ ଜଦି ଗରବ୍ ତିଙ୍କିନେ  
 ସା ସାହାସ୍ ତିଙ୍କିଏ ତେଲା ମୁର୍କ୍ ରକମ୍ ନେଙ୍ଗ୍ ବାସଙ୍ଗିଂ ନେଙ୍ଗ୍‌ନେ  
 ଦେଡ୍‌ରକମ୍ ସାଆସ୍ ଲେଃକେ । ୨୨ ମେଇଁ ମେଃମେଃନେ ଏବୁୀ  
 ବାସାଣ୍ଡେ ? ନେଙ୍ଗ୍ ଡିଗ୍ ଏବୁୀ ବାସାଣ୍ଡେ । ମେଇଁ ମେଃନେ

ଇଶ୍ରାଏଲ୍‌ରେ ରେମୁଆଁ ? ନେଇଁ ତିଗ୍ ଇଶ୍ରାଏଲ୍‌ରେ ରେମୁଆଁ ।  
 ମେଇଁ ମେଠମେଠନେ ଅବ୍ରାହାମ୍‌ନେ କୁଲ୍‌ବଂସ ? ନେଇଁ ତିଗ୍  
 ଅବ୍ରାହାମ୍‌ନେ କୁଲ୍‌ବଂସ । ୨୩ ☆ମେଇଁ ମେଠମେଠନେ କିସଟନେ  
 ସେବାରେ ? ନେଇଁ ବାୟା ରକମ୍ ବାସଙ୍‌ଶିଁ ନେଇଁ ମେଁଇଁନେ  
 ବାନ୍ ମ୍ନା ସେବାରେ । ନେଇଁ ମେଁଇଁନେ ବାନ୍ ମାଲେ କସ୍  
 ତିଙ୍‌ମ୍‌କେ ଜାବର୍ ଜେଲ୍ ଝେନେଲେଠକେ ବାରି ତୁତୁ ଏତେ  
 ବଗ୍‌କେ ସାମ୍‌ଲେ ନ୍‌ଲେଠକେ ବାରି ପ୍ରେଗ୍‌ପ୍ରେଗ୍ ଗୁଏନ୍‌ନିଆ ସାମ୍‌ନା  
 ତିଙ୍‌ନେକେ । ୨୪ ମାଲ୍‌ତର୍ ନେଇଁ ଜିଉଦିଇଁନେବାନ୍ ଅନଚାଲିସ୍  
 ତୁତୁମାଡ୍ ଚଙ୍‌ନେକେ । ୨୫ ରୋମାୟଇଁନେବାନ୍ ଝିତର୍ ଚାବୁକ୍  
 ମାଡ୍ ଚଙ୍‌ନେକେ । ମୁଇଁତର୍ ବି ମାଡ୍ ଚଙ୍‌ନେକେ । ଝିତର୍  
 ଜାଆଜ୍ ଗଟ୍‌ନାନେ ସାମ୍‌ନା ତିଙ୍‌ନେକେ ବାରି ମୁଇଁତର୍ କେଶିଆ  
 ଶିଆନ୍‌ନିଆ ୪୪ ଗଣ୍ଡା ନ୍‌ଲେଠକେ । ୨୬ ☆ଗୁଲୁଏ ତର୍ ଝେନେ  
 ବେଲା ଲଶିଆନେ ବୁରାଶିଆନ୍‌ନିଆ ତଙ୍‌ରେଇଁନେ ବିପଦ୍‌ନିଆ ନିଜର୍  
 ଜିହୁଦି ବାନ୍ ବିପଦ୍‌ନିଆ ଜିହୁଦି ଅଣଜିଉଦି ବାନ୍ ବିପଦ୍‌ନିଆ  
 ସହର୍‌ନେ ବିପଦ୍‌ନିଆ କଣ୍ଡା ବିପଦ୍‌ନିଆ କେଶିଆନେ ବିପଦ୍‌ନିଆ  
 ସାମ୍‌ନା ତିଙ୍‌ନେକେ । ୨୭ ଜାବର୍ କସ୍ ତିଙ୍‌ନେକେ ବାରି ଦୁକ୍‌କସ୍  
 ବଗେ ନ୍‌ଲେଠକେ ଲେମୁଆଃ ବାରି କେଡେସ୍ ଉଗ୍‌ତ୍ୟା ଗୁଲୁଏ ଦିନ୍  
 କାଟେମ୍‌କେ ଦର୍‌କାର୍‌ନେ ବଲେ ପାଟାଇ ବାରି ଲେଠନେ ଜାଗା  
 ଅବାବରେ ଗୁଲୁଏ କସ୍ ସାମ୍‌ଲେମ୍‌କେ । ୨୮ ବାକି ସାପା ବିସୟ୍  
 ଆଃତାର୍‌ଚେ କାଲାଆଃ ନେଇଁ ଆଡାତ୍ରା ମଶ୍‌ଲି ଚିନ୍ତା ପାଙ୍‌କେ ।  
 ୨୯ ଜାଣ୍ଡେ ଜଦି ଅସକ୍‌ତିଆ ତିଙ୍‌ଝେଏ, ନେଇଁ ତିଗ୍ ମେଁ ଏତେ  
 ଅସକ୍‌ତିଆ ମନେ ତିଁଶିଁକେ । ଜାଣ୍ଡେ ପାପ୍ ତିଙ୍‌ଲା, ନେଇଁ ମନେ  
 କସ୍ ବଦା ଶିଁକେ ।

୩୦ ଜଦି ଗରବ୍ ତିଙ୍‌ନେ ତିଙ୍‌ଏ ତେଲା ନେଇଁନେ ଏନ୍ ସାପା  
 ଅସକ୍‌ତିଆ ନସା ଆନେଇଁ ଗରବ୍ ତିଙ୍‌ନେ ପଡେଏ । ୩୧ ନେଇଁ  
 ମିର୍ ନାବାସଙ୍‌କେ ଶୁ । ମେଁ ମ୍ୟାଲେଠକେ ଜେ ମାପୁ ଜିସୁ  
 କିସଟନେ ଆବା ଇସପରନେ ଜୁଗ୍ ଜୁଗ୍ ଦନ୍‌ସ ତିଙ୍‌ଲେଠ ।  
 ୩୨ ☆ନେଇଁ ଦାମାସ୍‌ସନ୍‌ନିଆ ଲେଠନେବେଲା ଇଃସାଙ୍‌ ଆରେଟ୍‌ସନେ

☆ ୧୧:୨୩ ୧୧:୨୩ ପ୍ରେରିଡ୍ ୧୭:୨୩. ☆ ୧୧:୨୬ ୧୧:୨୬ ପ୍ରେରିଡ୍ ୯:୨୩; ପ୍ରେରିଡ୍ ୧୪:୫. ☆ ୧୧:୩୨ ୧୧:୩୨ ପ୍ରେରିଡ୍ ୯:୨୩-୨୫.

ତାଗ୍ରା ସାସନ୍ ତିଂଶ୍ଚୁ ଆନେଙ୍ଗ୍ ବନ୍ଦି ଆଡିଙ୍ଗ୍ ନ୍‌ସା ସହରନେ ପିତୁରପାକା ଉର୍‌ଶ୍ଚେକେ ଆଉର୍‌ବକେ ।<sup>୩୩</sup> ମାତର୍‌ ଆନେଙ୍ଗ୍ ଚାଟ୍‌ନା ଏତେ ନଗର୍‌ ବାଏରେ ଜର୍‌କା ପାକା ଆଃଜାର୍‌ ବିଃ ଆର୍କେ । ଦେକ୍‌ ରକମ୍‌ ବାବ୍‌ରେ ନେଙ୍ଗ୍‌ ଆତେନ୍‌ ସାସନ୍‌ ତିଂଶ୍ଚେନେ ବାନ୍‌ ରକ୍ୟା ବାଲ୍ଲେଃ ।

## ୧୨

### ପାଉଲ୍‌ ମୁଆଃ କିକେନେ

<sup>୧</sup> ମେଃଡିଗ୍‌ ଲାବ୍‌ ଆଡିଙ୍ଗ୍‌ଲା ଡିଗ୍‌ ଆନେଙ୍ଗ୍‌ ଏଲେଡିଗ୍‌ ଗରବ୍‌ ଡିଙ୍ଗ୍‌ନେ ପଡେଏ । ମାତର୍‌ ମାପୁ ଆନେଙ୍ଗ୍‌ ଆଣ୍ଡିନେ ସାପା ମୁଆଃ କିକେନେ ବାରି ସାପା ବିସୟ୍‌ ଆନେଙ୍ଗ୍‌ ବିବକେ ଆତେନ୍‌ ନେଙ୍ଗ୍‌ ମ୍ବାସଙ୍‌ଏ ।<sup>୨</sup> କ୍ରିସ୍ଟିୟାନ୍‌ ରେମୁଆଁ ମୁଇଙ୍ଗ୍‌ ଗଅଁ ମୁଆଁ ଇଡିଙ୍ଗ୍‌ ଙ୍ଵି କିତଂନ୍ନିଆ ଷ୍ଟେଲେଃକେ ମେଁ ଗାଗଡେନ୍ନିଆ ଲେଃକେ ଶୁଲା ଗାଗଡେ ବାଏରେ ଲେଃକେ ନେଙ୍ଗ୍‌ ନାମ୍ୟାକେ ଶୁ ଆତେନ୍‌ ମାତର୍‌ ଇସପର୍‌ ମ୍ୟାଲେଃକେ ।<sup>୩</sup> ଅଁ, ଦେକ୍‌ରକମ୍‌ ରେମୁଆଁକେ ନେଙ୍ଗ୍‌ ମ୍ୟାଲ୍ଲେକେ ମେଁ କିତଂଇନିନ୍ନିଆ ତୁଂଝିଗ୍‌ବକେ । ମେଁ ଗାଗଡେନ୍ନିଆ ଲେଃକେ ଶୁଲା ଗାଗଡେ ବାଏରେ ଲେଃକେ ଆତେନ୍‌ ନେଙ୍ଗ୍‌ ନାମ୍ୟାକେ ଶୁ । ମାତର୍‌ ଇସପର୍‌ ମ୍ୟାଲେକେ ।<sup>୪</sup> ଆଣ୍ଡିନେ ରେମୁଆଁ ବାନ୍‌ ବାସଙ୍‌ନେ ତିଂଆୟା ଶୁ । ଦେକ୍‌ରକମ୍‌ ସାମୁଆଁନିଆ ବାସଙ୍‌ ଆୟାକେ ରକମ୍‌ ବାରି ଆଃତର୍‌ସା ଆୟାକେ ରକମ୍‌ ସାମୁଆଁଅଁକେ ।<sup>୫</sup> ଏନ୍‌ ରେମୁଆଁ ନ୍‌ସା ନେଙ୍ଗ୍‌ ଗରବ୍‌ ଶୁଙ୍‌ଏ । ମାତର୍‌ ନିଜର୍‌ ଅସକ୍‌ତିଆ ଆଃତାର୍‌ରେ ବିନ୍‌ ମେଃଡିଗ୍‌ ବିସୟ୍‌ନ୍ନିଆ ନେଙ୍ଗ୍‌ ଗରବ୍‌ ନାଡିଙ୍ଗ୍‌ ଶୁ ।<sup>୬</sup> ଗରବ୍‌ ଡିଙ୍ଗ୍‌ନେ ତାଗ୍ରା ମୁକ୍‌ ଆଡିଙ୍ଗ୍‌ ଶୁ ତାଗ୍ରା ନେଙ୍ଗ୍‌ ସଡ୍‌ ସାମୁଆଁ ମ୍ବାସଙ୍‌ଏ । ମାତର୍‌ ନେଙ୍ଗ୍‌ ଗରବ୍‌ ନାଡିଙ୍ଗ୍‌କେ ଶୁ ତାଗ୍ରା ନେଙ୍ଗ୍‌ ଚାଏଁଶ୍ଚିଂକେ, ରେମୁଆଁ ଆନେଙ୍ଗ୍‌ ଡିରକମ୍‌ କାମ୍‌ ଡିଙ୍ଗ୍‌ନେ କେଆର୍‌ଏ ଶୁଲା ନେଙ୍ଗ୍‌ବାନ୍‌ ଡିରକମ୍‌ ସାମୁଆଁ ଅଁଆର୍‌ଏ, ମେଁବାନ୍‌ ଆନେଙ୍ଗ୍‌ ମ୍ବା ତାଗ୍‌ଚେ ମନେ ଆଡିଙ୍ଗ୍‌ପା ।

<sup>୭</sup> ଏନ୍‌ସା ନେଙ୍ଗ୍‌ ଡିରକମ୍‌ ଜାବର୍‌ ଗରବ୍‌ ନାଡିଙ୍ଗ୍‌ ଶୁ ଏନ୍‌ସା ଆନେଙ୍ଗ୍‌ ବଗ୍‌ ନ୍‌ସା ନେଙ୍ଗ୍‌ନେ ଗାଗଡେନ୍ନିଆ ଗଲିଆନେ ଦୁଡ୍‌ ରକମ୍‌ ମୁଇଙ୍ଗ୍‌ କାମ୍‌ ବିଆର୍‌କେ ଡିରକମ୍‌ ନେଙ୍ଗ୍‌ ଜାବର୍‌ ଗରବ୍‌ ନାଡିଙ୍ଗ୍‌ ଶୁ

ଏନ୍‌ସା ଆତେନ୍ ବିଆରକେ । ୮ ଡିରକମ୍ ଆତେନ୍ ନେଙ୍ଗ୍‌ବାନ୍ ସ୍ତୁ  
 ତିଙ୍ଗ୍‌ଏ ଏନ୍‌ସା ନେଙ୍ଗ୍ ମାପୁକେ ଆତେନ୍ ବିସୟରେ ଝିତର୍ ପାରତନା  
 ଶୁଙ୍ଗ୍‌କେ । ୯ ମାତର୍ ମେ ଆନେଙ୍ଗ୍ ବାସଙ୍ଗ୍‌କେ “ନେଙ୍ଗ୍‌ନେ ଲିବିସ  
 ନାନେ ନ୍‌ସା ଜାବର୍ ନାନେ ଅସକ୍ତିଆ ତିଙ୍ଗ୍‌ନେ ବେଲା ନେଙ୍ଗ୍‌ନେ  
 ବପୁ ସମାନ୍ ବାବ୍‌ରେ ନ୍‌ଏ ।” ତେସା କିସ୍‌ଟନେ ବପୁ ନେଙ୍ଗ୍ ଆଡ଼ାଡ଼ା  
 ଅଦିକାର୍ ତିଙ୍ଗ୍‌ନେ ସା ନେଙ୍ଗ୍ ନେଙ୍ଗ୍‌ନେ ଅସକ୍ତିଆ ନ୍‌ସା ଜାବର୍  
 ଗରବ୍ ଶୁଙ୍ଗ୍‌ଏ ବାରି ସାର୍ଦା ଶୁଙ୍ଗ୍‌ଏ । ୧୦ ତେସା କିସ୍‌ଟନେ ନ୍‌ସା ସାପା  
 ରକମ୍ ଅସକ୍ତିଆ ଅପମାନ୍ ଦୁକ୍ କସ୍ ବାରି ଆପଦ୍ ବିପଦ୍‌ନିଆ  
 ନେଙ୍ଗ୍ ସାର୍ଦାରେ ଗ୍ରାଅନ୍ ଶୁଙ୍ଗ୍‌ଏ ତାଗ୍ଲା ଉଡିବେଲା ନେଙ୍ଗ୍ ଅସକ୍ତିଆ  
 ଆତେନ୍ ବେଲା ନେଙ୍ଗ୍ ବପୁମାନ୍ ।

**କବିନୁତନେ ରେମୁଆଁଇଂନେ ନ୍‌ସା ପାଉଲ୍‌ନେ ବାବ୍‌ନା**

୧୧ ନେଙ୍ଗ୍ ମୁକ୍ ତିଙ୍ଗ୍‌ଲେକେ । ଏନ୍ ବାସଙ୍ଗ୍ ନ୍‌ସା ପେଇଂ  
 ଆନେଙ୍ଗ୍ ଜବଡ଼ଜସ୍ତି ପେଡିଙ୍ଗ୍‌କେ ତାଗ୍ଲା ନେଙ୍ଗ୍‌ନେ ପ୍ରସଂସା ତିଙ୍ଗ୍‌ନେ  
 ପେଇଂନେ ଦରକାର୍ ଲେଃକେ । ନେଙ୍ଗ୍ ମେଃଡିଗ୍ ଶୁଲା ତିଗ୍  
 ପେଇଂନେ ଆତେନ୍ “ମ୍ଲାନେ ବେବକ୍ଲେ ସିସ୍‌ଇଂନେବାନ୍” ମେଃଡିଗ୍  
 ଗୁନ୍‌ନିଆ ଡାଆଁ ଶୁ । ୧୨ ନେଙ୍ଗ୍ ପେଇଂନେ ଏତେ ଲେଃନେ ବେଲା  
 ମୁଇଙ୍ଗ୍ ବେବକ୍ଲେ ତାଗରେ ପର୍ମାନ୍ ତିଙ୍ଗ୍‌ବକ୍ଲେ କାମ୍ ନେଙ୍ଗ୍  
 ତିଙ୍ଗ୍‌ମୁକେ । ଗୁଲୁଏ ତିନା କାବା ବାରି ଇରିଆଡୁଗ୍‌ନେ କାମ୍  
 ଆଃସୁଏମୁକେ । ଏନ୍ ସାପା ନେଙ୍ଗ୍ ଗୁଲୁଏ ସାଆସ୍ ଏତେ ତିଙ୍ଗ୍‌ମୁକେ  
 । ୧୩ ମାତର୍ ମୁଇଙ୍ଗ୍ ବିସୟରେ ବିନ୍‌ବିନ୍‌ନେ ମଣ୍ଡଲିବାନ୍ ପେଇଂନେ  
 ଏତେ ନେଙ୍ଗ୍‌ନେ ବାଃଲିର୍‌ବାଃତା ବିନେ ତିଙ୍ଗ୍‌ଲେଃ । ଜଦି ନେଙ୍ଗ୍  
 ନିଜେ ଲିଗିଙ୍ଗ୍ ରକମ୍ ନାଡିଙ୍ଗ୍‌କେ ଶୁ ତେଲା ଏନ୍‌ସା ଆନେଙ୍ଗ୍  
 ଲିବିସରେ କେମା ତିଙ୍ଗ୍‌ପା ।

୧୪ ଝିତର୍ ନ୍‌ସା ପେଇଂନେ ତାଗ୍ଲା ଝେ ନ୍‌ସା ନେଙ୍ଗ୍ ତିଆର୍  
 ତିଙ୍ଗ୍‌ଲେକେ । ନେଙ୍ଗ୍ ପେନେବାନ୍ ମେଃଡିଗ୍ ବିସୟ ନ୍‌ସାଲ୍ୟା  
 ଶୁ । ନେଙ୍ଗ୍ ଆପେକେ ଚାଏଁଶିଂକେ । ପେଇଂନେ ଦନ୍ ସମ୍‌ତି ଶୁ  
 । ତାଗ୍ଲା ଆବା ଇୟାଙ୍ଗ୍‌ନେ ସା ଗଡ଼େଇଂ ଆଆର୍ଜେ ଆର୍‌ଶୁ ଆବା  
 ଇୟାଙ୍ଗ୍ ଗଡ଼େଇଂ ନ୍‌ସା ଆର୍ଜେ ବ ଆର୍‌ଏ ୧୫ ଏନ୍‌ସା ନେଙ୍ଗ୍ ତାଗ୍ଲା  
 ମେଃଡିଗ୍‌ନେ ଲେଃକେ ନେଙ୍ଗ୍ ସାର୍ଦାରେ ଏତେ ଆପେକେ ମ୍‌ଏ ।  
 ପେଇଂନେ ସା ନେଙ୍ଗ୍ ନିଜେକେ ତିଙ୍ଗ୍ ମ୍‌ଏ । ଜଦି ନେଙ୍ଗ୍ ଆପେକେ

ଜୀବର ବଳ୍ ମ୍ବାଏ ତେଲା ପେଇଂ ମେଃନ୍‌ସା ଆନେଙ୍ଗ୍ ଆଲାଦ୍‌ନିଆ ଗଣ୍ଡା ଆଲାଦ୍ ପେଡିଙ୍ଗ୍ ?

୧୭ ନେଙ୍ଗ୍ ପେଇଂନେ ଆଡାଡା ଲିଗିଙ୍ଗ୍ ରକମ୍ ନାଡିଙ୍ଗ୍‌କେ ଶୁ । ଏନ୍ ସାମୁଆଁ ପେଇଂ ସତେଆ ଗ୍ରାଅନ୍ ପେଡିଙ୍ଗ୍ । ମାତର୍ ପେଇଂନେ ଡାଗ୍ରାବାନ୍ ଜାଣ୍ଟେ ବାସଙ୍ଗ୍ ଯାଆରଏ ନେଙ୍ଗ୍ ଚାଲାକି ବାବ୍‌ରେ ମିର୍ ବାସଙ୍ଗ୍‌ରେ ଆପେକେ ଉନ୍‌ବଃନ୍‌ନିଆ କ୍ଲାରମ୍‌କେ । ୧୭ ପେଇଂନେ ଡାଗ୍ରା ଆଣ୍ଟିନେଣ୍ଟେକେ ବେମ୍‌କେ ମେଁଇଂନେ ବିଡ୍ରେ ଜାଣ୍ଟେନେ ବାନ୍ ନେଙ୍ଗ୍ ମେଃଡିଗ୍ ପେଇଂନେବାନ୍ ମେଃଡିଗ୍ ସୁବିଦା ଅଦିକାର୍ ତିଙ୍ଗ୍‌ମ୍‌କେ ? ୧୮ ପେଇଂନେ ଡାଗ୍ରା ଝେନେ ସା ନେଙ୍ଗ୍ ତିତସ୍‌କେ କୁସାମୁତି ଶ୍ରିଙ୍ଗ୍‌କେ ବାରି ମେଁନେ ଏତେ ବୟାଁଇଂକେ ମ୍‌କେ । ତିତସ୍ ପେଇଂନେବାନ୍ ମେଃଡିଗ୍ ସୁବିଦା ଅଦିକାର୍ ତିଙ୍ଗ୍‌ବକେ ଡାଗ୍‌ରେ ଜାଣ୍ଟେ ବାସଙ୍ଗ୍ ପେୟାଏ ? ନେ ମେଁନେ ମୁଇଙ୍ଗ୍ ମନ୍‌ନିଆ ବାଃଲିର୍‌ବାଃତା ନେଡିଙ୍ଗ୍‌କେ ଶୁ ? ନେ ମେଁନେ ମୁଇଙ୍ଗ୍ ଅ ଚିନ୍‌ନିଆ ନେଝେକେ ଶୁ ?

୧୯ ଏଃଜାକ ପେଇଂ ବାବେ ପେଡିଙ୍ଗ୍‌କେ ଜେ, ନେ ପେଇଂନେ ଡାଗ୍ରା ଦସ୍ ଆଃଡିଙ୍ଗ୍‌ନେବକେ । ଇସ୍‌ପର୍‌ନେ ସେଃମ୍ କ୍ରିଷ୍ଟୁ ଆନେକେ ବାସଙ୍ଗ୍‌କେ ଡାଗ୍‌ରେ ନେ ଆପେକେ ନେବାସଙ୍ଗ୍‌କେ । ନିଜର୍ ବନ୍ଦୁଇଂ, ନେ ମେଃ ମେଃନେ ନେଡିଙ୍ଗ୍‌ଏ, ଆତେନ୍ ମାତର୍ ପେଇଂନେ ବଲ୍ ନ୍‌ସା ନେଡିଙ୍ଗ୍‌କେ । ୨୦ ଡାଗ୍ଲା ନେଙ୍ଗ୍‌ନେ ରୁଚମେଗ୍ ତଡିଂକେ ନେଙ୍ଗ୍ ପେଇଂନେ ଡାଗ୍ରା ଝେରେ ଆପେକେ ଡିରକମ୍ କେନ୍‌ସା ଇକଟା ତିଙ୍ଗ୍‌ଶ୍ରିଂକେ ଦେଡ୍‌ରକମ୍ କେନ୍‌ସା ନାବା ଶୁ ବାରି ପେଇଂ ନେଙ୍ଗ୍‌ନେ ଆଣ୍ଟିନେ ରୁପ୍ କେନ୍‌ସା ଇକଟା ପେଡିଙ୍ଗ୍‌କେ ଶୁ ତିଙ୍ଗ୍‌ପାରେ ଆତେନ୍ କେନ୍‌ସା ପେବାଏ । ତିଙ୍ଗ୍‌ପାରେ ଆଡ୍‌ଅରିଆ ଝେରେ ନେଙ୍ଗ୍ ବିନ୍‌ବିନ୍ ରକମ୍ କଲ୍‌କଲା, ଇଂସା, ଗିସେଃ, ନିଜେ ନ୍‌ସା କିକେଣ୍ଟେ, ବିନ୍‌ଶ୍ଟେନେ ସେବା, ଗରବ୍ ବାରି ନ୍‌ଲୁଗ୍‌ନିଆ ବାସଙ୍ଗ୍‌ନେ କେନ୍‌ସା ପେବାଏ । ୨୧ ଏକ୍ରେ ପେଇଂନେ ଡାଗ୍ରା ଝେନେବେଲା ତିଙ୍ଗ୍‌ପାରେ ଇସ୍‌ପର୍ ପେଇଂନେ ସେଃମ୍ ଆନେଙ୍ଗ୍ ଗିଆସଃ ଆଃଡିଙ୍ଗ୍‌ଏ ଜାଣ୍ଟେଇଂ ସେନ୍‌ଗ୍ ପାପ୍ ତିଙ୍ଗ୍‌ବଆରକେ ମାତର୍ ମେଁଇଂନେ ପର୍‌ରଲ୍‌ଶୁ ସ୍ଲୋଆଣ୍ଟେଙ୍ଗ୍ ଅଡାରେଗ୍ ବାରି ଗିଆସଃମାଲା ନ୍‌ସା ଆବାବେଆର୍ ଶୁ ଦେକ୍‌ରକମ୍ ଗୁଲ୍‌ଏ ନ୍‌ସା ଆନେଙ୍ଗ୍ ଦୁକ୍ ବାନେ ପଡେଏ ।

## ୧୩

### ସାରାସାରି ଗୁଆରି ବାରି ସାର୍ଲ

୧ ନେଙ୍ଗ ପେଇଁନେ ତାଗ୍ରା ଜିତର୍ ପାଙ୍ଗୁଣ୍ଡିଙ୍ଗ । “ସାପା ଦାବି ନ୍‌ସା ମାୟା ଶୁଲ୍ଲା ଜିରୁଆ ସାକିନେ ସାମନା ପେନେ ସାପା ଦାବି ତିଙ୍ଗିଲା ସତ୍ ତାଗ୍‌ରେ ପାରମାନ୍ ତିଙ୍ଗିଏ ।” ୨ ଅଃସେ ପାପ୍ ତିଙ୍ଗିକ୍ରେ ରେମୁଆଁଇଁକେ ବାରି ବିନ୍ ସାପାରେକେ ନେଙ୍ଗ ମ୍ପାର୍‌ତର୍ ଆଡ୍‌ଅରିଆ ଝେରେ ବାସଙ୍ଗମ୍‌କେ ବାରି ଏବେ ସ୍ତୁ ଲେଃରେ ତିଗ୍ ବାସଙ୍ଗମ୍‌କେ ଜେ ନେଙ୍ଗ ଏଃକେ ଝେଲା ତେଲା ଆମେଇଁକେ ନ୍ନାଆଡ୍‌ତାର୍ ଶୁ । ୩ କିସ୍‌ଟ ଜେ ନେଙ୍ଗ ତାଗ୍ରା ସାମୁଆଁ ବାସଙ୍ଗ ତିଙ୍ଗିକ୍ରେ ଏନ୍ ବିସୟରେ ପେଇଁ ଚାଏଁତିଙ୍ଗେ ସାପା ପରମାନ୍ ବାପେଲେକେ । ପେଇଁନେ ଆଡ୍‌ତାତ୍ରା ଅସକ୍‌ତିଆ ଶୁ ମାତର୍ ପେଇଁନେ ତାଗ୍ରା ମେଁ ମେଁନେ ବପୁ ସ୍ତାମୁଆଁଃ ବିଃବକେ । ୪ ମେଁ ପେଇଁନେ ଆଡ୍‌ତାତ୍ରା ଅସକ୍‌ତିଆ ଶୁ ମାତର୍ ପେଇଁନେ ତାଗ୍ରା ବପୁ ଲେଃକେ । ତାଗ୍ଲା ମେଁ ଅସକ୍‌ତିଆ ନ୍‌ସା କୁରୁସନ୍ନିଆ ଗୁଏକେ ଏଲେତିଗ୍ ଇସ୍‌ପର୍‌ନେ ବପୁ ନ୍‌ସା ମେଁ ଜିବନ୍ ଲେଃକେ । ନେ ତିଗ୍ ମେଁନେ ତାଗ୍ରା ଅସକ୍‌ତିଆ ମାତର୍ ଇସ୍‌ପର୍‌ନେ ବପୁ ନ୍‌ସା ନେ ପେଇଁନେ ଆଡ୍‌ତାତ୍ରା ମେଁନେ ଏଡେ ଜିବନ୍ ନେତିଙ୍ଗିଏ ।

୫ ପେଇଁ ବିସ୍‌ବାସ୍‌ନିଆ ପେଲେକେ ଲେଃ ଶୁ ଆତେନ୍ ବିସୟରେ ନିଜେ ନିଜେକେ ପରିକ୍ୟା ତିଙ୍ଗିପା ନିଜର୍ ନିଜର୍‌ନେ ବିଚାର୍ ତିଙ୍ଗିପା ଶୁଲ୍ଲା ଜିସୁ କିସ୍‌ଟ ଜେ ପେଇଁନେ ତାଗ୍ରା ଲେଃକେ ଏନ୍ ଲେଃ ପେଇଁ ନିଜର୍ ନିଜର୍ ବିସୟରେ ପେମ୍ୟାକେ ଶୁ ? ଜଦି ଏନ୍ ଆଡ୍‌ତିଙ୍ଗି ଶୁ ତେଲା ପେଇଁ ପରିକ୍ୟା ସମାନ୍ ଶୁ । ୬ ନେଙ୍ଗ ଆସା ଶୁଙ୍ଗିଏ ନେ ଜେ ପରିକ୍ୟା ସମାନ୍ ଏନ୍ ପେଇଁ ପେମ୍ୟାଏ । ୭ ପେଇଁ ମେଃଡିଗ୍ ଅନ୍‌ମାୟ କାମ୍ ଆଡ୍‌ତିଙ୍ଗିଗ୍‌ପା, ଏନ୍‌ସା ନେନେ ଇସ୍‌ପର୍‌ନେ ତାଗ୍ରା ପାର୍‌ତନା ତିଙ୍ଗିନେତିଙ୍ଗିକ୍ରେ । ନେ ଜେ ଆକ୍‌ଅରିଆ ଜିତେ ନେଲେକେ, ଏନ୍ ନେ ଆସୁଏ ନ୍‌ସା ଝେ ନେତିଙ୍ଗିକ୍ରେ, ମାତର୍ ନେନେ ସରାଃ ତିଙ୍ଗିବେଲା ତିଗ୍ ପେଇଁ ତିରକମ୍ ସତ୍ କାମ୍ ପେଡିଙ୍ଗିଏ, ଏନ୍‌ସା ପାର୍‌ତନା ତିଙ୍ଗିନେତିଙ୍ଗିକ୍ରେ । ୮ ମାତର୍ ନେ ସତ୍ ବିସୟରେ ମେଃଡିଗ୍ ତିଙ୍ଗି ନେୟା ଶୁ ତାଗ୍ଲା ସତ୍ ପାକା କାମ୍ ତିଙ୍ଗି ନେୟାଏ । ୯ ନେନେ ଅସକ୍‌ତିଆ ଲେଃକେଲା ପେଇଁ ବପୁ ପେଲେଃଲା

ନେନେ ସାର୍ଦା । ତେସା ପେଇଂ ନିମାଣ୍ଡା ଡିଙ୍ଗ୍‌ପା ଡାଗ୍‌ରେ ନେନେ ପାର୍‌ତନା ଡିଙ୍ଗ୍‌ନେଡିଙ୍ଗ୍‌କେ । ୧୦ ଆଡେନ୍‌ସା ସ୍ତୁ ଲେଃରେ ନେଙ୍ଗ୍ ପେଇଂନେ ଡାଗ୍ରା ଏନ୍ ଉଲିଆଃ ଗୁଆର୍‌ମ୍‌କେ ଡିଙ୍ଗ୍‌ପାରେ ପେଇଂନେ ଡାଗ୍ରା ଝେଚାନେ ବେଲା ଡିରକମ୍ ଡାଟ୍ ବାବ୍‌ରେ ଆନେଙ୍ଗ୍ ଅଦିକାର୍ ଡିଙ୍ଗ୍‌ନେ ଆପଡେ ଶୁ । ଡାଗ୍‌ଲା ଆପେକେ ବିଗ୍‌ଡେନେ ଶୁ, ମାଡର୍ ଗଡେନ୍‌ସା ମାପୁ ଆନେଙ୍ଗ୍ ଅଦିକାର୍ ବିବକେ ।

୧୧ ଅ ବୟା ବାରି ତନାଇଂ ସାର୍ଦା ଡିଙ୍ଗ୍‌ପା ପବିତ୍ର ଡିଙ୍ଗ୍‌ପା ଚେଡ୍‌ନା ଡିଙ୍ଗ୍‌ପା ମୁଇଙ୍ଗ୍ ମନ୍ ଡିଙ୍ଗ୍‌ପା ସାନ୍ତିନ୍ନିଆ ବାସା ଲାଃଲାପା ବାରି ଆଲାଦ୍ ବାରି ସାନ୍ତିନେ ଇସ୍‌ପର୍ ପେଇଂନେ ଏଡେ ଲେଃଏ ।

୧୨ ପବିତ୍ର ବୈନ୍ତା ବିଚେ ନିଜର୍ ନିଜର୍ ବିତ୍ତେ ସାର୍‌ଲପା । ସାପା ସାଦୁ ଆପେକେ ସାର୍‌ଲ ଆର୍‌ଡିଂକେ । ପର୍‌ମେସର୍‌ନେ ସାପା ରେମୁଆଁ ଆପେକେ ସାର୍‌ଲ ଆର୍‌ଡିଂକେ ।

୧୩ ମାପରୁ ଯାଶୁ କିସ୍‌ଟନେ ଅନୁଗ୍ରଅ, ଇସ୍‌ପର୍‌ନେ ଆଲାଦ୍ ଆରି ପବିତ୍ର ଆମ୍‌ନେ ସାଆଜ୍ୟ ପେ ସାପାରେନେ ଏଃଡେ ଲେଃଲେ । ୧୪ ନେଇଂନେ ମାପୁ ଜିସୁ କିସ୍‌ଟନେ ଲିବିସ ପର୍‌ମେସର୍‌ନେ ଆଲାଦ୍ ବାରି ପବିତ୍ର ଆମ୍‌ନେ ଲିବିସ ପେନେ ସାପାରେନେ ସାହା ଡିଙ୍ଗ୍‌ଲେଃ ।

**ସତ୍ ଗାଳି**  
**The New Testament in the Gata' language of India: ସତ୍**  
**ଗାଳି (Bible)**

copyright © 2020 The Word for the World International

Language: Didayi (Gata')

Contributor: The Word for the World International

**ସତ୍ ଗାଳି**  
**ଯାଶୁ ମାପୁରୁନେ ନି ନିଅମ୍, 2020**

The Gata Didayi Testament Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-09

---

PDF generated using Haiola and XeLaTeX on 21 Feb 2024 from source files dated 9 Apr 2023

cd536811-9eb4-56d5-9546-afaca24c958c